

萬有文庫

第一集一千種

王雲五主編

陸放翁集

(一十)

陸游著

商務印書館發行



陸放翁集

(一十)

陸游著

國學基本叢書

陸放翁集

劍南詩藁

卷第十四

十月二十六日夜夢行南鄭道中既覺恍然攬筆作此詩時且五鼓矣

孤雲兩角不可行。望雲九井不可渡。蟠冢之山高插天。漢水滔滔日東去。高皇試劍石爲分。草沒苔封猶故處。將壇坡陀過千載。中野疑有神物護。我時在幕府。來往無晨暮。夜宿沔陽驛。朝飯長木舖。雪中痛飲百榼空。蹴踏山林伐狐兔。耽耽北山虎。食人不知數。孤兒寡婦讎不報。日落風生行旅懼。我聞投袂起。大噉聞百步。奮戈直前虎人立。吼裂蒼崖血如注。從騎三十皆秦人。面青氣奪空相顧。國家未發渡遼師。落魄人間傍行路。對花把酒學醞藉。空辱諸公誦詩句。卽今衰病臥在牀。振臂猶思備征戍。南人孰謂不知兵。昔者亡秦楚三戶。

雨晴步至山亭欲遂遊東村不果

村陋垣屋頽。歲晚風雨橫。泥塗絕還往。殮粥養衰病。藥囊雜書卷。白髮滿清鏡。一榻臥兼旬。不踐牆下徑。烏鵲忽報晴。霜重節候正。厭供凍硯愁。頗動蠟屐興。山楹快遠眺。松吹愜幽聽。地瘦藥苗稀。葉脫木枝勁。東村未爲遠。腳力不濟勝。三歎入荆扉。跣趺學僧定。

喜晴

衡門病臥動經旬。歲晚況堪風雨頻。晴日一窗殊慰眼。清霜萬瓦更宜人。開書頓失昏花墜。試茗初看白乳新。南埭東陂從此好。剩將紅蕊插烏巾。

對食

人苦不知足。貪欲浩無窮。豹胎日麋飲。萍蠶卻時供。飲豚以人乳。萬乘亦改容。方其未遇時。鵝鶩動英雄。哀哉王相國。計墮飯後鐘。所以賢達士。一視約與豐。我亦踰踰者。羈遊半生中。木饜飽藜覓。美與玉食同。口腹嗟幾何。曾是役我躬。放箸一笑粲。賦詩曉愚公。

不睡

城遠不聞鐘鼓傳。孤村風雨夜騷然。但悲綠酒欺多病。敢恨青燈笑不眠。水冷硯蟾初薄凍。火殘香鴨尙微煙。虛窗忽報東方白。且復繙經繡佛前。

睡

紙帳青氈暖有餘。昏昏信腳到華胥。凍醪有力勤推挽。春茗無端苦破除。半熟攤衾聞急雨。乍回推枕覓殘書。箇中得意君知否。萬戶一作里。生封未必如。

憶荊州舊遊

書劍萬里行。翩翩度關。登隴常慨然。射麋雲夢最樂事。至今曠快思楚天。落筆千言不加點。班荆百榼命割鮮。有時憑陵呼五白。笑人辛苦作太玄。君不見將軍昔忍跨下辱。京兆晚爲人所憐。功名富貴自古只如此。不如馳射樂飲終殘年。

五雲門晚歸

高城帶遠林。落日動寒砧。行客自朝暮。青山無古今。衰遲慙逸氣。憂患足危心。溪迳滯歸艇。何時春水深。

冬暖

今年歲暮無風雪。塵土肺肝生客熱。經旬止酒臥空齋。吳蟹秦酥不容設。日憂疾疫被齊民。更畏螟蝗殘宿麥。濃霜薄霰不可得。太息何時見三白。老夫壯氣橫九州。坐想提兵西海頭。萬騎吹笳行雪野。玉花亂點黑貂裘。

歲暮

吳中寒氣薄。歲暮亦和風。移樹木村北。尋僧渡港東。露葵收半綠。霜稻杵微紅。一飽無餘念。吾生正不窮。

雪夜

書卷紛紛雜藥囊。擁衾時炷海南香。衰遲自笑壯心在。喜聽北風吹雪牀。

又

村路雪泥人斷行。佛燈一點絳紗明。山前栖鶴歸何晚。磔磔風傳勁鬪聲。

禪室

早誇劇飲無勍敵。晚覺安禪有宿因。赫赫心光誰障礙。緜緜鼻息自輕勻。蒲龕紙帳藏身穩。香椀燈籠作夢新。勿爲霜寒憶溫暖。少林立雪彼何人。

炭盡地爐危坐至夜分戲作

短景窗易黑。長宵爐少紅。直令貧到骨。未害氣如虹。志士元謀道。儒生敢諱窮。霜嚴雞喔喔。但愧讀書功。

夜汲井水煮茶

病起罷觀書。袖手清夜永。四鄰悄無語。燈火正淒冷。山童亦睡熟。汲水自煎茗。鏘然轆轤聲。百尺鳴古井。肺腑凜清寒。毛骨亦蘇省。歸來月滿廊。惜踏疎梅影。

雪後尋梅偶得絕句十首

雪晴蕭散曳筇枝。小塢尋梅正及時。臨水登山一年恨。十分說似要渠知。

又

青帝宮中第一妃。寶香熏徹素綃衣。定知謫墮不容久。萬斛玉塵來聘歸。橋中四叟博輸玉塵九斛。

又

銀燭檀槽醉海棠。老來非復錦城狂。疎梅對影太清淡。爲拂焦桐彈履霜。

又

雪裏芬芳亦偶然。世人便謂占春前。飽知桃李俗到骨。何至與渠爭著鞭。

又

雙鵲飛來噪午晴。一枝梅影向窗橫。幽人宿醉閑欹枕。不待聞香已解醒。

又

竹籬曲曲水邊村。月澹霜清欲斷魂。商略前身是飛燕。玉肌無粟立黃昏。

又
相逢未易可疎親。不是登牆宋玉鄰。林下風標許誰比。直須江左謝夫人。

又

春近山中日漸長。重重雲崦閤幽香。神仙不飲塵凡酒。素面看人醉後狂。

又

蕊殿仙姝下界遊。偶來稅駕剡溪頭。君看月裏橫枝影。盡是蒼龍與翠虬。

又

清霜夜夜奈寒何。賴是知心有素蛾。枉道疎枝不禁笑。主人歡意自無多。

寄朱元晦提舉

市聚蕭條極。村墟凍餒稠。勸分無積粟。告糴未通流。民望甚飢渴。公行胡滯留。徵科得寬否。尙及麥禾秋。

村居冬日

溪轉樵風路。林藏禹會村。簷冰垂玉塔。山月涌金盆。畏客常稱疾。耽書不出門。尙嫌城市近。更擬卜雲根。
寓天慶觀有林使君年八十七方燒丹云一黍米大可化汞一斤爲黃金梅道人年八十五善醫
世路崎嶇久已忘。道腴禪悅度年光。故攜開士降龍鉢。來寄高人夢蝶牀。只道燒金有劉向。不知賣藥是
韓康。日長坐覺非塵世。庭檜花開蜂蜜香。

宿天慶道院

衰病厭多事。清遊諧夙心。夜深樓突兀。歲晚柏蕭森。汲井洗靈藥。焚香橫素琴。身閑境自勝。城市亦山林。
贈林使君
使君物外閱年華。厭聽奴兵早暮衙。雙履踏雲呼野渡。一瓢邀月醉梅花。紅爐點汞閑消日。烏几緡經不
憶家。我亦岷山有歸處。約君同載泝三巴。

又

松檜陰中百步廊。我來剝啄叩琳房。魚腸寶劍餘蛟血。鴉嘴金鋤帶藥香。弱水蓬萊風浩浩。赤明龍漢劫
茫茫。何妨付與神丹訣。教跨青鸞到帝鄉。

冬夜

窮巷蕭條早閉門。北窗燈火夜昏昏。老于俗事不挂眼。愁憶故人空斷魂。急雪打窗飛礫細。狂風卷野怒
濤翻。土牀紙帳寒無寐。彊把村醪不厭渾。

宴坐

身寄窮山裏。心安一事無。新傳小止觀。漸解半跏趺。急雪鳴窗紙。孤燈耿地爐。老來元少睡。且復兀枯株。
夢中作

路平沙軟淨無泥。香草丰茸沒馬蹄。擣紙聲中春日晚。恍然重到浣花溪。

夜寒遣興

道人頽然寄北窗。愁魔百萬一笑降。夜闌酒渴有奇夢。吞楚七澤吳三江。孤村蕭蕭雨解雪。寒犬噤臥飢

鼠齧擁衾危坐待天明。白首忍窮心似鐵。

雪後出遊戲作

小巘平岡雪陸離。幽人又賦探春詩。典琴沽酒元非俗。著屐觀碑又一奇。大度乾坤容落托。多情風月笑衰遲。吾生也似梅花淡。燕未歸來蝶不知。

歲暮

半生浪走跨秦吳。白首還如筮仕初。凍芋濁醪邀里巷。昏煙溼雪暗郊墟。窮空敢恨寒無褐。憂患元因出有車。笑掩陳編聊自慰。古來富貴羨樵漁。

記夢

世事紛紛觸眼新。何由常作夢中身。遠遊萬里纔移刻。豪飲千場不忤人。鼓吹滿城壺日晚。鶯花如海洞天春。是間可老君知否。莫信人言想與因。

立春後三日作

拂面毵毵巷柳黃。穿簾細細野梅香。春回江表常年早。日向山中特地長。千古事終輸釣艇。一毫憂不到禪房。綠尊掩罷惟須睡。高枕看人舉世忙。

短景

短景迫窮冬。日月如鳥過。衡門窘風雨。衰病不可那。疎疎屋茅漏。獵獵窗紙破。鼠豪冒燈出。人倦掩屏臥。中都舊朋儕。零落今幾箇。弄筆欲遣愁。孤吟誰與和。

風雨旬日春後始晴

風吹過雁作斜行。雨洗殘梅只淡香。南浦春回波漸綠。東菴睡起日初長。詩囊屬稿慚新思。博齒爭豪悔昔狂。莫向晴窗對明鏡。朱顏減盡鬢蒼蒼。

乍晴風日已和泛舟至扶桑埭徘徊西村久之

十日風雨今日晴。衰病忽減思閑行。接羅一幅煙霧薄。舴艋八尺鳧鷖輕。亭亭孤塔遠天碧。曲曲深巷斜陽明。數家茅屋門晝掩。不聞人聲聞碓聲。身似龐公不入城。東阡南陌餞餘生。新年倘有豐年喜。買酒漁村看太平。

晨起南窗晴日可愛戲作一絕

蕭散山林一幅巾。天公乞與自由身。茅簷不似宮塲暖。日滿南窗也可人。

攜瓊尊醉梅花下

楠瘦作尊容。斗許擁腫輪。困元媚嫵。肯從放翁來住山。誰云置身不得所。山房寂寞久不飲。作意欲就梅花語。我病鮮歡花更甚。日暮淒涼泣殘雨。人生萬事雲茫茫。一醉常恐俗物妨。正須仙人冰雪膚。來伴老子鐵石腸。花前起舞花底臥。花影漸東山月墮。瓊尊未竭狂未休。笑起題詩識吾過。

城西接待院後竹下作

水邊小丘因古城。上有巨竹數百箇。一徑蛇蟠不容腳。平處乃可十客坐。裊裊共看風枝舞。蔌蔌時聽春籟墮。古佛不粧香火冷。瘦僧如腊袈裟破。門前西去長安路。日夜舳舻銜尾過。老夫本乏臺省姿。且就清

陰曲肱臥。

夜飲示坐中

胡雁叫羣寒夜長。嶢嶢北斗天中央。達人觀眇萬物。烈士壯心懷四方。縱酒長鯨渴吞海。草書瘦蔓飽經霜。付君詩卷好收拾。後五百年無此狂。

夜從父老飲酒村店作

旗亭濁酒典衣沽。蟹舍老翁折簡呼。夜中醉歸騎草驢。冤昂不須宗武扶。丹徒布衣有籌略。漁陽突騎莫枝梧。牀頭金盡何足道。肝膽輪囷橫九區。

壬寅新春

半生常是道邊人。歲晚初收事外身。濁酒一樽聊永日。小園三畝亦新春。尙無枕寄邯鄲夢。那有衣沾京洛塵。門外煙波三百里。鏡湖三百里。此心惟與白鷗親。

幽居春夜

暮景催人雪鬢雙。十年始復反吾邦。雲逢佳月每避舍。酒壓閑愁如受降。三弄笛聲初到枕。一枝梅影正橫窗。要知清夢遊何許。不釣桐江卽錦江。

讀書

放翁白首歸剡曲。寂莫衡門書滿屋。藜羹麥飯冷不嘗。要足平生五車讀。校讎心苦謹塗乙。吟諷聲悲雜歌哭。三蒼奇字已殺青。九譯旁行方著錄。有時達旦不滅燈。急雪打窗聞簌簌。倘年七十尙一紀。墜典斷

編真可續。客來不怕笑書癡。終勝牙籤新未觸。

晨起

小雨溼清曉。新鶯啼早春。年光驚病眼。節物屬閑身。巴峽東連楚。嶓山北控秦。遠遊端可繼。敢恨素衣塵。

昔在成都正月七日聖壽寺麻子市初春行樂處也。偶晨興聞鄰村守麻有感。

樂事新年憶錦城。城南麻市試春行。如今老病茅簷底。臥聽兒童嚇雀聲。

賦詩

獨孤生策字景略。河中人工文善射。喜擊劍。一世奇士也。有自峽中來者言其死于忠涪間。感涕憶昨騎驢入蜀關。旗亭邂逅一開顏。氣鍾太華中條秀。文在先秦兩漢間。寶劍憑誰占斗氣。名駒竟失養天閑。身今老病投空谷。回首東風涕自潸。

早春對酒感懷

探花疇昔喜春回。老大空驚節物催。芳盞旋開新壓酒。好枝猶把未殘梅。書生歲惡甘藜莧。志士時平死草萊。初聞獨孤篋死欲豁孤懷。誰語語。夜彈長劍有餘哀。

曉出湖邊摘野蔬

浩歌振履出茅堂。翠蔓丹芽采插忙。且勝堆盤供苜蓿。未言滿斛進檳榔。行迎風露衣巾爽。淨洗羶葷匕筯香。著句誇張君勿笑。故人方厭太官羊。

泔餓之餘復苦久雨感歎有作

道傍襁負去何之。積雨仍愁麥不支。爲國憂民空激烈。殺身報主已差池。屬饜糠粃猶多愧。徙倚柴荆只自悲。十載西遊無惡歲。羨他罨下足蹲鴟。予在蜀幾十年。未嘗逢歲歉也。

春晴泛舟

兒童莫笑是陳人。湖海春回發興新。雷動風行驚蟄戶。前一日聞雷。天開地闢轉鴻鈞。鱗鱗江色漲石黛。嫋嫋柳絲搖麴塵。欲上蘭亭卻回棹。笑談終覺愧清真。

攜一尊尋春湖上

酒裏真須勉策勳。百年何啻是中分。花梢已點猩猩血。水面初生瑟瑟紋。一世極知均腐骨。萬鍾元自付浮雲。浩歌不恨無人和。但惜驚飛白鷺羣。

晦前二日夜欲曉自湖上歸對殘月獨酌

小閣對寒蟾。山尊盡更添。方看一輪滿。又歎兩頭纖。脈脈離雲嶠。娟娟傍畫簷。五更清露下。不恨客衣霑。

春曉有感

山杏溪桃續續開。緩歌誰與共傳盃。年來只有追歡夢。百舌無情又喚回。

夜觀秦蜀地圖

往者行省臨秦中。我亦急服叨從戎。散關摩雲俯賊壘。清渭如帶陳軍容。高旌縹緲嚴玉帳。畫角悲壯傳霜風。咸陽不勞三日到。幽州正可一炬空。意氣已無雞鹿塞。單于合入蒲萄宮。燈前此圖忽到眼。白首流落悲塗窮。吾皇英武同世祖。諸將行策雲臺功。孤臣昧死欲自薦。君門萬里無由通。正令選壯不爲用。筆

墨尙可輸微忠。何當勒銘紀北伐。更擬草奏祈東封。

久雨小飲

春來日日風雨橫。老去時時衰病攻。門外回塘初漲綠。尊前槁面暫生紅。未除豪氣每自笑。欲吐狂言無與同。安得并刀剪簷溜。憑高萬里望晴空。

有懷獨孤景略

富貴世間元不乏。此君才大獨難成。喑鳴意氣千人廢。嫺雅風流一座傾。韜略豈勞平大敵。文章亦足主齊盟。荒山野水涪州路。腸斷西風薤露聲。

春雨復寒遣懷

去日堂堂挽不回。新年又傍鬢邊來。雨聲欲作海棠祟。書卷只爲春睡媒。村舍瘦蔬供薄酒。地爐微火伴殘灰。浩然忽起金鞭興。漾水嶓山安在哉。

春遊

平生樂行役。不耐常閉戶。今朝新雨霽。一笑整巾屨。青猿導幽蹊。春草伴微步。雖云尊酒薄。蔬果亦略具。辛夷發高枝。楊柳吹墮絮。行歌不知遠。落日呼野渡。橫林已棲鴉。淺水猶立鷺。歸來意頗豪。古錦有新句。

海棠

今日春已半。風雨停出遊。餅中海棠花。數酌相獻酬。尙想錦官城。花時樂事稠。金鞭過南市。紅燭宴西樓。千林誇盛麗。一枝賞纖柔。狂吟恨未工。爛醉死卽休。那知茅簷底。白髮見花愁。花亦如病姝。掩抑向客羞。

尤物終動人。要非桃杏儔。東風萬里恨。浩蕩不可收。

寄仗錫平老借用其聽琴詩韻

放翁久矣無此客。闔戶兒童皆動色。寒泉不食人喝死。素綆銀瓶我心惻。千金易得一士難。晚途淹泊眼愈寒。豈知一旦乃見子。傑語豪筆無僧酸。門前清溪天作底。細細風吹穀紋起。倚欄一笑誰得知。愛子數詩如此水。江湖安得常相從。浩歌相踏臥短篷。功名渠自有人了。留我錦中雙頰紅。

五月十四日夜夢一僧持詩編過。予有暴雨詩語頗壯。予欣然和之。聯巨軸欲書未落筆而覺追作此篇。

黑雲寒空萬馬屯。轉盼白雨如傾盆。狂風疾雷撼乾坤。壯哉澗壑相吐吞。老龍騰擊下天關。鱗間火作電脚奔。巨松拔起千年根。浮槎斷梗何足論。我詩欲成醉墨翻。安得此雨洗中原。長河袞袞來崑崙。鸛鵲下看黃流渾。

新塘觀月

攜酒新塘南。中夜欲忘歸。貪看月滿湖。不覺露溼衣。天高鶴聲厲。風急螢火稀。此夕不一醉。行歎破鏡飛。漁家亦喜事。未掩水際扉。皇天有公道。處處皆清暉。

觀張提刑周鼎

他人富貴堆金璧。曼舞妖歌誇坐客。清心好古誰似公。漢庭諸人推博識。一朝得此周廟器。買不論貲空四壁。苔痕洗盡銅色見。坐臥摩挲欲忘食。蠻童捧出客爲起。恍如清廟陪劍履。腹中奇字粲蟲魚。嶧山之

碑那得比。知公原是功名人。看罷握手同悲辛。鎬京洛邑在何許。漠漠秋風吹虜塵。

口占送巖師還大梅護聖

放翁白髮已蕭然。黃紙新除玉局仙。寄語山頭老師叔。欲分茅舍度殘年。常禪師偈云。更移茅舍入深居。謂護聖也。

八月十四日夜湖山觀月

長空露洗玻璃碧。紫金之盤徑三尺。忽看擘地出人間。桂樹扶疎如淡墨。攬衣獨立鏡湖邊。風露萬頃秋渺然。開帆詎必入東海。騎鯨便可追飛仙。冰壺玉盞侵骨冷。醉看孤鸞舞清影。夜闌歸舍人已眠。卻倩天風爲吹醒。

十五夜月色皦然有頃雲生遂不復見

北望但空闊。南望橫羣山。青天無翳行素月。寥寥永夜非人間。九醞漿成老仙醉。六銖衣薄天宮寒。翠眉真人不火食。小立環佩風珊珊。橫空邀我海山去。縹緲萬里騁青鸞。相攜一笑在雲表。徐看玉宇飛金盤。

夜聞秋風感懷

西風一夜號庭樹。起攬戎衣淚濺襟。殘角聲催關月墮。斷鴻影隔塞雲深。數篇零落從軍作。一寸淒涼報國心。莫倚壯圖思富貴。英豪何限死山林。

玉局歌

玉局祠官殊不惡。銜如冰清俸如鶴。酒壺釣具常自隨。五尺新蓬織青籊。倚樓看鏡待功名。半世兒癡晚

方覺何如醉裏泛桐江。長笛一聲吹月落。蔣公新冢石馬高。謝公飛旄凌秋濤。微霜莫遣侵鬢綠。從今二十四考書玉局。

醉歌

往時一醉論斗石。坐人飲水不能敵。橫戈擊劍未足豪。落筆縱橫風雨疾。雪中會獵南山下。清曉嶙峋玉千尺。道邊狐兔何曾問。馳過西村尋虎跡。貂裘半脫馬如龍。舉鞭指麾氣吐虹。不須分弓守近塞。傳檄可使腥羶空。小胡逋誅六十載。猖獗獠子勢已窮。聖朝好生貸孳戮。還爾舊穴遼天東。

閉門

寂寂雲山千萬重。閉門不忍歎塗窮。高秋酒熟雪浮瓮。中夜劍歸雷吼空。近報犬羊逃漠北。豈無貔虎定關中。君王猶記孤忠在。安得英豪共此功。

草書歌

傾家釀酒三千石。閒愁萬斛酒不敵。今朝醉眼爛巖電。提筆四顧天地窄。忽然揮掃不自知。風雲入懷天借力。神龍戰野昏霧腥。奇鬼摧山太陰黑。此時驅盡胸中愁。搥牀大叫狂墮幘。吳牋蜀素不快人。付與高堂三丈壁。

野飲夜歸戲作

青海天山戰未塵。卽今塵暗舊戎袍。風高乍覺弓聲勁。霜冷初增酒興豪。未辦大名垂宇宙。空成慟哭向蓬蒿。灞亭老將歸常夜。無奈人間兒女曹。

夜泊水村

腰間羽箭久凋零。太息燕然未勒銘。老子猶堪絕大漠。諸君何至泣新亭。一身報國有萬死。雙鬢向人無再青。記取江湖泊船處。臥聞新雁落寒汀。

幽居

遶屋巉巖碧玉峯。個中天遣養疎慵。捐書已歎空虛腹。得酒還澆壘塊胸。曲几坐看窺戶月。短篷臥聽隔城鐘。柴桑自有歸來意。枉道人間不見容。

與鄰翁登山亭

數掩欂櫨圍夕照。一間茅舍背陰崖。吾生擾擾實無樂。人事悠悠那可諧。憂患向來侵綠鬢。登臨此日費青鞋。京華舊友凋零盡。野老逢迎一散懷。

無題

輾轉氈車赴密期。追歡最數牡丹時。新春欲近猶貪喜。舊愛潛移不自知。寶鏡塵生鸞悵望。鈿箏絃絕雁參差。玉壺莫貯臙脂淚。從溼泥金帶上詩。

遣興

平生與俗馬牛風。落魄人間亦未窮。綠綺奏終香縷碧。烏絲書罷鬪花紅。夢中吳蜀山川近。醉後周秦戰伐空。投老飄然君勿笑。也勝魚鳥在池籠。

夢宴客大樓上命筆作詩既覺續成之

表裏江山亦樂哉。華纓滿座敵鄒枚。歌從郢客樓中聽。獵向樊姬墓上回。梅蕊香清筓寶髻。熊蹯味美按新醅。眼邊歷歷興亡事。欲賦章華恐過哀。

新塘夜歸

煙月茫茫十里堤。數聲漁唱埭東西。旋燒新兔傾村酒。扶得歸來醉似泥。

古風

少年慕黃老。雅志在山林。火食亦彊勉。寧有婚宦心。失脚墮世網。衰病忽侵尋。放逐適天幸。獨恨山未深。一牀元不睡。翛然橫素琴。開門毛髮冷。湖闊月欲沈。

又

賀鑑未嘗死。江天醉初醒。逸少亦度世。弭節過蘭亭。吾本淡蕩人。轉徙如蓬萍。聊憑一盃綠。駐此雙鬢青。邂逅兩仙翁。笙鶴遊青冥。還家不能食。濁世紛羶腥。

又

功名如博戲。大叫或作盧。文辭組繡耳。初不繫賢愚。負恃已可笑。憎嫉真區區。平生學金丹。我豈斯人徒。嘯歌醉自和。顏鬢老不枯。卻後三百年。煙雨釣鏡湖。

累日無酒亦不肉食戲作此詩

小築精廬剡曲傍。枵然蟬腹與龜腸。酒錢覓處無司業。齋日多來似太常。雲碓旋舂菰米滑。風爐親候藥苗香。明年更入南山去。要試囊中服玉方。

讀書

讀書四更燈欲盡。胸中太華蟠千仞。仰呼青天那得聞。窮到白頭猶自信。策名委質本爲國。豈但空取黃金印。故都卽今不忍說。空宮夜夜飛秋燐。士初許身耀稷契。歲晚所立慚廉藺。正看憤切詭成功。已復雍容託觀釁。雖然知人要未易。詎可例輕天下士。君不見長松臥壑困風霜。時來屹立扶明堂。

自妙相歸將至杜浦堰舟中作

斜陽發東郭。初夜轉西城。寺閣疎鐘動。漁村遠火明。蒼茫林靄滅。撲漉水禽驚。漸喜吾廬近。遙聞過埭聲。

秋興

樵風溪上弄扁舟。濯錦江邊憶舊遊。豪竹哀絲眞昨夢。爽砧繁杵又驚秋。墜枝橘熟初堪剪。浮瓮醅香恰受篘。莫道身閒總無事。孤燈夜夜寫清愁。

哀北

太行天下脊。黃河出崑崙。山川形勝地。歷世多名臣。哀哉六十年。左衽淪胡塵。抱負雖奇偉。沒齒不得伸。老夫實好義。北望常酸辛。何當擁黃旗。徑涉白馬津。窮追殄犬羊。旁招出鳳麟。努力待傳檄。勿謂吳無人。

琵琶

西蜀琵琶邏。遶槽梨園舊。譜鬱輪袍。繡筵銀燭燕宮夜。一飲千鍾未足豪。故蜀燕王宮。今爲張氏海棠園。

三江舟中大醉作

志欲富天下。一身常苦飢。氣可吞匈奴。束帶向小兒。天公無由問。世俗那得知。揮手散醉髮。去隱雲海涯。

風息天鏡平。濤起雪山傾。輕帆入浩蕩。百怪不可名。虹竿秋月鉤。巨鯨倘可求。滅迹從今逝。回看隘九州。

短歌行

百年鼎鼎世共悲。晨鐘暮鼓無休時。碧桃紅杏易零落。翠眉玉頰多別離。涉江采菱風敗意。登樓待月雲爲祟。功名常畏謗讒興。富貴每同衰病至。人生可歎十八九。自古危機無妙手。正令插翮上青雲。不如得錢卽沽酒。

悲秋

秋燈如孤螢。熠燿耿窗戶。秋雨如漏壺。點滴連早暮。我豈楚逐臣。慘愴出怨句。逢秋未免悲。直以憂國故。三軍老不戰。比屋困征賦。可使江淮間。歲歲常列戍。

步至西村

一飽無餘事。西村偶獨行。搘筇息微倦。汲井漱餘醒。川闊雁平度。谷虛雲亂生。絕知豐歲樂。笑語隔柴荆。

題接待院壁

笙歌淒咽離亭晚。回首高城半掩門。疊疊遠山橫翠靄。娟娟新月耿黃昏。未嫌雙舫妨欹枕。自是孤舟易斷魂。遙想柯橋落帆處。隔江微火認漁村。

九月晦日作

菊枝傾倒不成叢。柯葉凋零已半空。自是老來多感慨。不應蕭瑟爲秋風。

又

山路清寒近探梅。振衣高處興悠哉。飛鴻杳杳江天闊。一片愁從萬里來。

又

錦城誰與寄音塵。望斷秋江丈六鱗。正使傾家供麩粩。定知不解醉愁人。

又

炊煙漠漠衡門寂。寒日昏昏倦鳥還。數樹丹楓映蒼檜。天工解作范寬山。

陶山遇雪覺林遷。菴主見招不果往。

山中大雪二尺彊。道邊虎跡如椀大。衰翁畏虎復畏寒。招喚不來公勿怪。梨花開時好風日。走馬尋公作寒食。不須沽酒引陶潛。箭筈蕨芽如蜜甜。

哭王季夷

迢遙天馬渥洼來。萬里修途忽勒回。爽氣卽今猶可想。舊遊何處不堪哀。夢中有客徵殘錦。地下無爐鑄橫財。欲酌一尊身尙病。鬢封春露溼蒼苔。

樊江晚泊

碧雲吞日天欲暮。城西捩柁城東路。蓴羹菰飯香滿船。正是江頭落帆處。荻洲漁火遠更明。煙水蒼茫聞雁聲。不是綠尊能破悶。白頭客路若爲情。

蛾眉村旅舍作

小雨初收景氣和。青苔狼藉落梅多。曲肱野店睡斜日。濯足溪橋鳴細波。久厭俗情生眼白。近承天詔賜

顏酖予自壬寅冬兩頰復丹。騎鯨未返蓬壺去。此路猶須幾浩歌。

娥江野飲贈劉道士

春光盎盎催官柳。柳色黃如醖中酒。橋邊微徑幽尋。世外高人共攜手。參差茅舍出木末。隱映酒旗當浦口。插花處處引村童。失道時時問耕叟。客堪共醉百無一事。不諸心十常九。日斜潮落不可留。孤舟欲上頻搔首。

丈亭遇老人長眉及肩欲就之語忽已張帆吹笛而去

颯颯長眉綠覆肩。欲推壽數意茫然。若非楚國庚寅歲。定是堯時丙子年。銅笛一聲驚宿鷺。蒲帆數幅破晴煙。遙知乘醉江湖去。黃鶴樓頭又放顛。

寓舍聞禽聲

日暖林梢鴨鷓鳴。稻陂無處不青青。老農睡足猶慵起。支枕東窗盡意聽。

春晚

雨足人家插稻秧。蠶生鄰女采桑黃。萬花掃迹春將暮。百草吹香日正長。閒覓啼鶯穿北崦。戲隨飛蝶過東岡。飄然且喜身強健。不怪兒曹笑老狂。

題瑩師釣臺圖

羊裘老子釣魚處。開卷令人雙眼明。未可忽忽便持去。夜窗吾欲聽灘聲。

仗錫平老具舟車迎前天衣印老印悉遣還策杖訪之作二絕句奉送兼簡平

畫舫籃輿不許前。白頭行脚意超然。舜江禹穴千山水。盡在高人拄杖邊。

又

魚鼓聲中白氎巾。南山筍蕨一番新。長安不是無卿相。林下平津獨可人。

湖邊曉行

蹇驢清曉掠湖堤。緩轡迎涼帽影低。露坼渚蓮紅漸鬧。雨催陂稻綠初齊。先秋葉已時時墮。失旦雞猶續續啼。不是老來忘睡美。戴星南畝慣扶犁。

久雨杜門遣懷

風雨蕭蕭臥掩關。經旬登覽負溪山。也知解送豐年喜。無奈難消永日閑。平野橫吹看凌厲。畫簷高瀉聽淙潺。城闌路斷吾何恨。濁酒枯魚亦破顏。

梅雨陂澤皆滿

雨暗迷行路。溪深沒舊痕。汪汪牛渚白。盎盎酒醅渾。暖浸千畦稻。橫通十里村。羣蛙更堪笑。鼓吹鬧黃昏。

夜色

幌外燈青見鼠行。林梢月黑有梟鳴。只言中夏夜偏短。萬里夢回天未明。

又

睡覺鄰雞已再啼。蓬窗燈暗雨凄凄。東家蹇驢不用借。明日門前一尺泥。

幽事

老境俗緣減。閑居幽事多。去沙通斷澗。插援讓新荷。甚罷看山臥。釣歸搖櫂歌。餘年端有幾。風月且婆娑。

對酒戲作

去日奔輪不啻過。凌煙勳業已蹉跎。只言一寸丹心在。無奈千莖白髮何。色比鵝雛京口酒。聲如珠貫渭城歌。身閑取醉真常勉。莫學癡人夢蠓窠。

夏雨

清風起湖濱。急雨來天末。蚊蠅遽退聽。松竹例蘇活。奇聲集空庭。爽氣生細葛。素秋雖尙遙。聊喜寬肺渴。

軍中雜歌

三受降城無壘城。賊來殺盡始還營。漠南漠北靜如掃。清夜不聞胡馬聲。

又

秦人萬里築長城。不如壯士守北平。曉來磧中雪一丈。洗盡羶腥春草生。

又

匈奴莫復倚長戈。來款軍門早乞和。鐵騎如山尙可避。飛將軍來汝奈何。

又

名王金冠玉蹀躞。面縛纊下聲呱呱。槁街未遽要汝首。賣與酒家鉗作奴。

又

三月未春冰塞川。冬月苦寒雪闇天。紫髯將軍曉射虎。嚇殺胡兒箭似椽。

又

北面行臺號令新。繡旗豹尾渡河津。檄書纔下降書至。不用兒郎打女真。

又

漁陽兒女美如花。春風樓上學琵琶。如今便死知無恨。不屬番家屬漢家。

又

北庭茫茫秋草枯。正東萬里是皇都。征人樓上看太白。思婦城南迎紫姑。

夏夜舟中聞水鳥聲甚哀若曰姑惡感而作詩

女生藏深閨。未省窺牆藩。上車移所天。父母爲他門。妾身雖甚愚。亦知君姑尊。下牀頭雞鳴。梳髻著襦裙。堂上奉灑掃。廚中具盤飧。青青摘葵莧。恨不美熊蹯。姑色少不怡。衣袂溼淚痕。所冀妾生男。庶幾姑弄孫。此志竟蹉跎。薄命來讒言。放棄不敢怨。所悲孤大恩。古路傍陂澤。微雨鬼火昏。君聽姑惡聲。無乃譴婦魂。

暮歸舟中

五月未劇暑。暮從城市還。斷虹低飲澗。落日遠銜山。蟹舍叢蘆外。菱舟薄靄間。詩情終草草。虛遣鬢毛斑。

又

湖水綠可愛。弄橈衝夕霏。林昏漁火壯。山轉寺鐘微。老歎世情惡。窮知心事違。回頭語孤鶴。伴我莫先飛。

夏夜

夏夜忽已半。東岡月初生。起行遶庭樹。愛此露滴聲。漂流憶安臥。局促念遐征。幽懷誰晤語。華觴還自傾。

又

螢火喜暗庭。桐葉矜冷雨。幽人悄不寐。獨夜誰與處。乾坤信無情。歲月遽如許。明發視鏡中。鬢絲添幾縷。

又

庭荒蔓草長。堂豁爽氣入。悠然推枕起。聊作倚杖立。飛螢亦避雨。黏棟光熠熠。南鄰輸稅歸。小婦愁夜汲。

又

結屋在郊墟。翛然謝炎熾。窗扉故闕寂。水竹亦幽邃。飛蟲望燈集。栖燕衝雨至。石枕與葛幮。美哉今夕睡。

北渚

北渚露濃蘋葉老。南塘雨過藕花稀。新秋漸近蟬更急。殘日已沉鴉未歸。銅鏡面顏無藥駐。玉關勳業與心違。一蓑一笠生涯在。且醉蒼苔舊釣磯。

夏日五鼓起戲書

老雞喔喔桑樹顛。明星磊磊茅屋邊。我興視夜不復眠。坐看朝暾浴虞淵。開窗清風來穆然。拂几洗研整蠹編。火雲崔嵬忽滿天。安得羲和徐著鞭。

雨夜

急雨如河瀉瓦溝。空堂臥對一燈幽。老雞多事彊知曉。落葉無情先報秋。身未蓋棺誰可料。尊常有酒莫閑愁。功名老大從來事。且復長歌起飯牛。

小立

曠懷塵事外。小立綠陰間。舉世皆嫌拙。平生剩得閒。江郊雲易暗。旱歲雨終慳。欲醉尊無酒。悠然對暮山。

徙倚

漁扉夕不掩。徙倚欲三更。月正樹無影。露濃荷有聲。崢嶸歲將晚。悄悄恨難平。坐念中原沒。男兒恐浪生。

居山

涉世緣雖薄。居山味自長。穿雲雙履溼。洗藥一溪香。有酒作臉纈。無愁供鬢霜。遼天渺歸鶴。千載付茫茫。

卷第十五

秋興

白髮蕭蕭欲滿頭。歸來三見故山秋。醉憑高閣乾坤迤。病入中年日月遒。百戰鐵衣空許國。五更畫角只生愁。明朝煙雨桐江岸。且占丹楓繫釣舟。

又

暮境何堪與病遭。西風落葉擁亭臯。極知世上人情惡。且放江邊醉眼高。應俗紛紛何日了。詠詩混混寄吾豪。碧油金鎖平生意。未許人言學楚騷。

八月五日夜半起飲酒作草書數紙

有漏神仙有髮僧。碧幘欹枕對秋燈。忽然起索三升酒。颯颯蛟龍入剡藤。

秋雨漸涼有懷興元

八月山中夜漸長。雨聲燈影共淒涼。遙知南鄭風霜早。已有寒熊犯獵場。

又

十年前在古梁州。痛飲無時不慣愁。最憶夜分歌舞歇。臥聽秦女擘箜篌。

又

清夢初回秋夜闌。床前耿耿一燈殘。忽聞雨掠蓬窗過。猶作當時鐵馬看。

秋風曲

秋風吹雨鳴窗紙。壯士不眠推枕起。牀頭金盡酒尊空。櫪馬相看淚如洗。鴻門霸上百萬師。安西北庭九千里。帳前畫角聲入雲。隴上鐵衣光照水。橫飛渡遼健如鶴。談笑不勞投馬箠。堂堂羽檄從天下。夜半斫營屏可鄙。拾瑩讀書定何益。投筆取封當努力。百斤長刀兩石弓。飽將兩耳聽秋風。

送宣書記并寄其兄曇才二公

在吳識曇公。至蜀識才公。彌天宣書記。晚乃得從容。是家固多賢。天遣慰我窮。初秋夏末時。襜子各西東。子獨惜此別。共語夜燭紅。怪我耐逆境。萬事一笑空。子願知我否。視身如枯蓬。枯蓬未變滅。姑當付之風。家世無高年。我今六十翁。俯仰幾時客。結束已匆匆。那將須臾景。更受憂患攻。願言早來歸。相就煮晚菘。

起晚戲作

地偏身飽閑。秋爽睡殊美。老雞每愧渠。三唱呼未起。廚人罷晨汲。童子愁屣履。惰慵雖可嘲。安靜良足喜。心空夢亦少。酣枕甘若醴。不學多事人。南柯豪衆蟻。

飲村店夜歸

致主初心陋漢唐。暮年身世落農桑。草煙牛跡西山口。又臥旗亭送夕陽。

又

灑灑村醪君勿辭。橙椒香美白鵝肥。醉中忘卻身今老。戲逐螢光蹋雨歸。

雨夜感懷

點滴空塔雨。送涼青燈對影獨。淒傷身如病木驚。秋早心似鰈魚怯。夜長鑄得黃金猶有術。掃空白髮定無方。蕭然禪榻君休笑。一卷殘書伴枕傍。

寄葉道人

白首不堪憂患纏。要將樂事餞流年。尋山猶費幾兩屐。貯酒真須百斛船。若信王侯等螻蟻。可因富貴失神仙。老杜詩。王侯與螻蟻。共盡隨丘墟。太白詩。富貴與神仙。蹉跎成兩失。驚人亦莫摩銅狄。秦華松風足晝眠。

月下小酌

昨日雨邊簷。孤燈對搔首。今夜月滿庭。長歌倚衰柳。世變浩無窮。成敗翻覆手。人生最樂事。臥聽壓新酒。我歸自梁益。零落愴親友。紛紛墮鬼錄。何人得長久。後生多不識。詎肯顧衰朽。一杯無與同。敲門喚鄰叟。

讀袁公路傳

成敗相尋豈有常。英雄最忌數悲傷。蕪羹豆粥從來事。何恨郵亭坐簀床。

鄰曲小飲

早稻喜登場。相呼集野堂。迎霜新兔美。近社濁醪香。茆屋滴殘雨。竹籬圍夕陽。新豐不須作。真箇是吾鄉。

秋夜觀月

夢回殘燭耿房櫺。杳杳江天叫斷鴻。病骨不禁風露重。披衣小立月明中。

又

誰琢天邊白玉盤。亭亭破霧上高寒。山房無客兒貪睡。常恨清光獨自看。

枕上

香冷燈昏夢自驚。清愁冉冉帶餘醒。夜長誰作幽人伴。惟是蛩聲與月明。

秋夕大風松聲甚壯戲作短歌

人生不自憐。坐受外物械。榮華難把玩。俄頃皆變壞。山棲亦何有。耳目差曠快。秋郊多烈風。夜壑起松籟。初聞尚蕭瑟。髣髴聽嚴瀨。忽如倒巨浸。使欲翻大塊。又疑楚漢戰。澗洞更勝敗。不然六月雨。雷電奔百怪。三更勢稍斂。鐵馬歸入塞。孰能從吾遊。洗汝胸次隘。

明河篇

明河八月轉分明。炯如素練西南傾。年年歲歲見河漢。坊坊曲曲聞碓聲。良人萬里事征行。碓聲中有玉關情。遙知鐵衣冷如水。指點明河白髮生。磧中草死駱駝鳴。萬里卻望長安城。兒生總角爺未見。歸心頓覺封侯輕。漢家自古有夷狄。付與窮荒何足惜。只願天狼無光太白低。還家爲婦說安西。

夜聞鄰家治稻

二頃春蕪廢不耕，半生名宦竟何成。
歸來每羨農家樂，月下風傳打稻聲。

浪迹

浪迹人間四十年，鏡中不覺已華顛。
山川慘澹秋多感，燈火青熒夜少眠。
壯志已忘榆塞外，高情正在酒壚邊。
扁舟不恨無人識，且復長歌入暮煙。

夜步庭下有感

夜遶中庭百匝行，秋風傳漏忽三更。
星辰北拱疎還密，河漢西流縱復橫。
驚鵲遶枝棲不穩，冷螢穿竹遠猶明。
書生老抱平戎志，有淚如江未敢傾。

題酒家壁

明主何曾棄不才，書生飄泊自堪哀。
煙波東盡江湖遠，雲棧西從隴蜀回。
宿雨送寒秋欲晚，積衰成病老初來。
酒香菰脆丹楓岸，強遣樽前笑口開。

題書齋壁

隨分琴書適性情，乍寒偏愛小窗明。
旋煎粟粟留僧話，故種芭蕉待雨聲。
丹藥驗方非畏死，文章排悶不求名。
是間幽事君知否，莫怪經秋少入城。

贈貓

裹鹽迎得小狸奴，盡護山房萬卷書。
慚愧家貧策勳薄，寒無氈坐食無魚。

秋夕

羈魂虛仗些詞招。病骨那禁積毀消。亂葉打窗寒有信。昏燈照幔夢無聊。棧邊老驥心空在。爨下殘桐尾半焦。百感忽生推枕起。碧霄銀漢正迢迢。

秋雨排悶十韻

今夏久無雨。從秋卻少晴。空濛迷遠望。蕭瑟送寒聲。衣潤香偏著。書蒸蠹欲生。壞簷聞瓦墮。漲水見堤平。溝溢池魚出。天低塞雁征。螢飛明闌廡。蛙鬧雜疎更。藥醖時須焙。舟閑任自橫。未憂荒楚菊。直恐敗吳秔。夜永燈相守。愁深酒細傾。浮雲會消散。鼓笛賽西成。

小舟航湖夜歸書觸目

雲黑風號不見星。古丘叢木聚精靈。舟人已過微相語。兩兩三三鬼火青。

又

電掣半空雲黯黯。船浮積水浪憑陵。茫然不辯身何處。猶喜東南見塔燈。

又

遙望湖塘炬火迎。纔歸村舍雨如傾。畏途回首知安在。催喚兒童暖酒鐙。

幽居書事

莫歎人間苦不諧。清時有味是歸來。已因積毀成高臥。更借陽狂護散才。正欲清言聞客至。偶思小飲報花開。紛紛爭奪成何事。白骨生苔但可哀。

又

安命知天更不疑。幽居最愛早寒時。手中書墮初酣枕。窗下燈殘正劇棋。鮮鯽每從溪女買。香菰時就釣船炊。山陰清絕君須記。雪裏騎驢未辦詩。

晚霽

雨斷簷餘滴。雲疎日漏明。人其如積潦。天自活疲氓。溪碓舂香稻。霜叢剪綠橙。書生久愁臥。作意賦新晴。

又

漲水返舊壑。浮雲歸故山。園丁藝蔬去。鄰婦賃春還。喬木蒼煙外。孤村落照間。莫嫌樽酒薄。且用破愁顏。

雨後散步後園

淡日輕雲未快晴。涓涓溝水去無聲。爲憐一徑新苔綠。別就牆陰取路行。

又

澤國霜遲木未疎。秋來更覺愛吾廬。芭蕉綠潤偏宜墨。戲就明窗學草書。

示客

十年奔走每思歸。剩喜湖邊晝掩扉。社燕免教嘲作客。海鷗曾是信忘機。暉暉晚日收新稻。漠漠新寒試夾衣。留客盤殮君勿笑。一畦蔬甲摘初稀。

甲子晴

今日甲子晴。秋稼始可言。老農喜相覓。隨事具雞豚。掃地設菅席。酌酒老瓦盆。耳熱仰視天。何異傾金尊。

牛羊散墟落。霽色滿衡門。起舞屬父老。勿恨此酒渾。

後一日復雨

一雨三日水抹隄。南村北村雲淒淒。天公約束龍返穴。不忍嘉穀沈塗泥。日光清薄潦未縮。起視又歎行雲西。初纔浙瀝灑窗戶。俄已湍瀉鳴溝溪。豐凶相乘若翻手。振救小緩輒噬臍。窮閭腐儒不預此。且收芋栗寬兒啼。

紹興庚辰余遊謝康樂石門與老洪道士痛飲賦詩既還山陰王仲信爲予作石門瀑布圖今二十餘年別石門燈前感舊欲消魂。人生萬事皆如夢。自笑區區記劍痕。

又有四年開圖感歎作

愛酒黃冠鬢如雪。石門邂逅一樽同。懸知久作此山土。愁對畫圖秋雨中。

雨中遣懷

秋稼連雲飽不疑。寧期一敗莫支持。雨如梅子初黃日。水似桃花欲動時。正晝蚊蟲驅不去。終宵鼃黽怒何爲。凶年氣象堪流涕。禾把紛紛滿竹籬。

秋思

秋來情味更堪論。身寄城南五畝園。委轡看山無鐵纜。梅聖俞馬名。拾樵煎茗有青猿。王元之小童名。陂塘夜雨添新漲。原野煙蕪滅舊痕。豈是平生少親友。略無人肯訪孤村。

秋雨歎

點點滴滴雨到明。悽悽惻惻夢不成。窗間殘燈暗欲滅。匣中孤劍鏗有聲。少年讀書忽頭白。一字不試空虛名。公車自薦心實恥。新豐獨飲人所驚。太行千仞插雲立。黃流萬里從天傾。遺民久憤汙左袵。虜何足煩長纓。霜風初高鷹隼擊。天河下洗煙塵清。投筆急裝須快士。令人絕憶獨孤生。獨孤策蒲人。前歲死於峽中。

雨中小酌

晨起占雲日日西。吾廬煙雨正淒迷。愁看場上禾生耳。且泥盃中酒到臍。窗日幾時飛野馬。甕天惟是舞醯鷄。前村著屐猶通路。自摘金橙擣鱸齋。

衰病有感

衰與病相乘。山房冷欲冰。在家元是客。有髮亦如僧。愁絕窮秋雨。情親獨夜燈。西鄰有甘井。聊得曲吾肱。

又

倦枕先雞覺。寒汀伴雁孤。寂寥誰省錄。衰疾且枝梧。鶴骨秋添瘦。龜腸夜自呼。蓋棺吾事定。未敢泣窮途。

又

羈宦一周星。歸如化鶴丁。灰心成寂寂。霜鬢失青青。小智空自貴。大愚元不靈。客來應絕倒。扶病講丹經。

雨止頓寒遂有晴意

霧雨昏昏地氣騰。盤中朝暮厭驅蠅。未看霽色排陰翳。先覺清寒洗鬱蒸。喚客喜傾新熟酒。讀書貪趁欲

殘燈明朝樂事真當賀。山北山南曳瘦藤。

秋晴出遊

雨餘清冷近霜天。拄杖閑拖不挂錢。黃葉舞風初蔽蔽。碧渠通溜正濺濺。無情日馭工催老。耐事天公聽放顛。薄暮行歌並湖去。有人偷樣畫癡仙。

悲秋

形骸枯槁病侵陵。少睡長飢一老僧。霜夜羈愁更無賴。莫收書策且留燈。

又

蕭蕭衰鬢點新霜。人靜房櫳易斷腸。等是閉門愁裏過。任教風雨壞重陽。

又

殘年孤寂不禁秋。醉自淒涼醒更愁。富貴空成守錢虜。吾今何止百宜休。司空表聖自言有四宜休。

又

小雨簾櫳慘淡天。醉中偏藉亂書眠。夢回有恨無人會。枕伴橙香似昔年。

久雨道懷

暮年惜日月。木落輒動心。閑居念親友。所願聞足音。風雨斷官道。吾廬況幽深。渺渺雲水鄉。蕭蕭蘆荻林。草茂豪鳴蛙。天闊無來禽。四顧此何處。悠悠付孤斟。

野步書觸目

村落初過雨。園林殊未霜。幽花雜紅碧。野橘半青黃。飛鷺橫秋浦。啼鴉滿夕陽。最憐山脚水。撩亂入陂塘。

月下

月白庭空樹影稀。鵲棲不穩繞枝飛。老翁也學癡兒女。撲得流螢露濕衣。

九月十日

不須扇障庾公塵。散地翛然學隱淪。風帽可憐成昨夢。菊花已覺是陳人。昏昏但苦餘醒在。草草久無佳句新。歎息吾生行已矣。老來歲月似奔輪。

秋晴園中山禽絕多有感而賦

九日秋陰一日晴。山禽應喜我閑行。幽吭弄暖閑相命。勁翮凌風遠有聲。熟果啄餘看核墮。細枝銜得欲巢成。名園美蔭不飛去。似比交朋猶有情。

燈籠

我年十六遊名場。靈芝借榻棲僧廊。鐘聲纔定履聲集。弟子堂上分兩廂。燈籠一樣薄臘紙。瑩如雲母含清光。還家欲學竟未暇。歲月已似奔車忙。書生白首故習在。顛倒簡牘紛朱黃。短檠雖復作老伴。目力眩晃不可常。平生所好忽入手。摩挲把挈喜欲狂。蘭膏激灑支達旦。秋雨蕭瑟輸新涼。討論廢忘正塗乙。遂欲盡發萬卷藏。所嗟衰病終難勉。非復當年下五行。

舟過南莊呼村老與飲示以詩

我昔過此時。荷花粲雲錦。今我復來遊。霜露已悽凜。鄉鄰福苦薄。積雨敗垂稔。禾頭耳觶觶。熟計難高枕。

所懼憂吾君。歲暮韶發廩。勿言村醪薄。排悶聊共飲。

又

玄雲吞落日。大風東北起。隔林鳴兩鳩。當道行衆螳。晴來未三日。雨候乃復爾。我場何時乾。嘉穀在泥滓。豐凶歲所有。遊惰古所恥。努力教子孫。天公終可倚。

秋夜獨過小橋觀月

湖上蕭蕭葉落頻。小橋東畔綸巾。乍圓素月升寒壁。欲散微雲蹙細鱗。有酒便應遺世事。得閑隨處勝官身。笑談但恨朋遊少。安得幽人與卜鄰。

紹興中與陳魯山王季夷從兄仲高以重九日同遊禹廟後三十餘年自三橋泛舟歸山居秋高雨霽望禹廟樓殿重復光景宛如當時而三人者皆下世子亦衰病無聊慨然作此詩

重樓傑閣倚虛空。紅日蒼煙正鬱葱。鄉國歸來渾似鶴。交朋零落不成龍。人生真與夢何校。我輩故應情所鍾。淚漬清詩卻回棹。不眠一夜聽鳴蛩。

雜興

風雨雞喔喔。雪霜柏森森。獨居雖無友。二物感我深。

又

萬物各有時。蟋蟀以秋鳴。我老自少眠。那得憎此聲。

又

漲水入我廬。萍葉黏半扉。日出水返壑。念汝何由歸。

又

清霜染丹葉。秋晚粲如春。回首風吹盡。天公解戲人。

予秋夜觀月得瘡疾枕上賦小詩自戲

貪看霜月步亭臯。不覺寒侵范叔袍。且倚誦詩驅瘡鬼。斷無人寄碧腴膏。唐小說載鄭慶妻病瘡。杜子美教誦子璋獨體血模糊等句以却之。又元微之謫江陵病瘡。白樂天自長安寄以碧腴膏。

後春愁曲并序

予在成都作春愁曲。頗爲人所傳。偶見舊稿。悵然有感。作後春愁曲。

六年成都擅豪華。黃金買斷城中花。醉狂戲作春愁曲。素屏紈扇傳千家。當時說愁如夢寐。眼底何曾有愁事。朱顏忽去白髮生。真墮愁城出無計。世間萬事元悠悠。此身長短歸山丘。閉門堅坐愈生愁。未死且復秉燭遊。

秋花歎

秋花如義士。榮悴相與同。豈比輕薄花。四散隨春風。黃菊抱殘枝。寂寞臥寒雨。拒霜更可憐。和蒂浮煙浦。古來結交意。正要共死生。讀我秋花詩。可代丹雞盟。

寄題朱元晦武夷精舍

先生結屋綠巖邊。讀易懸知屢絕編。不用采芝驚世俗。恐人謗道是神仙。

又
蟬蛻巖間果是無。世人妄想可憐渠。有方爲子換凡骨。來讀晦菴新著書。

又

身閑剩覺溪山好。心靜尤知日月長。天下蒼生未蘇息。憂公遂與世相忘。

又

齊民本自樂衡門。水旱那知不自存。聖主憂勤常旰食。煩公一一報曾孫。

又

山如嵩少三十六。水似邛邛九折途。我老正須閑處著。白雲一半肯分無。

病思

夜窗孤影怯青燈。瘦著秋衣欲不勝。光景正如寒圃蝶。情懷卻羨病寮僧。篝爐冷落燒殘葉。禪榻欹斜倚古藤。莫怪頽然遺世事。鬢絲日日鏡中增。

病愈

秋夕高齋病始輕。物華凋落歲嶢嶢。蟹黃旋擘饑涎墮。酒淥初傾老眼明。提筆詩情還跌宕。倒牀藥裏尙縱橫。閑愁恰似憎人睡。又起挑燈聽雨聲。

病中忽有眉山士人史君見過欣然接之口占絕句

蜀語初聞喜復驚。依然如有故鄉情。絳羅餅餤玻璃酒。何日暮頤伴我行。眉州以羅裹餅餤。至二十四子。

號通義餼。玻璃春。郡酒名也。亦爲四州之冠。

初寒

我窮不自活。萬事付天公。今年寒苦晚。霧雨常濛濛。雖道裘褐憂。坐念疾病攻。清夜喜不寐。萬木號西風。新霜纔幾何。瘴癘一掃空。曉看烏臼林。已有數葉紅。微雲時去來。寒日猶曛曛。振衣起出戶。一笑尋鄰翁。

出塞曲

北風吹急雪。夜半埋氈廬。將軍八千騎。萬里逐單于。漢家如天臣。萬邦歡呼動地。單于降。鈴聲南來金閃鑠。赦書已報經沙漠。

無題

碧玉當年未破瓜。學成歌舞入侯家。如今顛顛篷窗裏。飛上青天妒落花。

道室卽事

一簪殘雪寄林亭。手把黃庭兩卷經。琴調養心安澹泊。爐香挽夢上青冥。隨緣久已均憂喜。玩世惟須半醉醒。溪父園公殊未見。頽然誰與共忘形。

夙興

青燈黃卷擁篝爐。殘髮垂蓬未暇梳。略似諸生勤夜課。絕勝小吏迫晨趨。雞聲喔喔寒猶力。月影離離淡欲無。幽致滿前君不領。枉因留滯歎頭顱。

長安道

千夫登登供版築。萬手丁丁供斲木。歌樓舞榭高入雲。複幕重簾晝燒燭。中使傳宣騎飛鞚。達官候見車擊轂。豈惟炎熱可炙手。五月瞿唐誰敢觸。人生易盡朝露晞。世事無常壞陂復。士師分鹿真是夢。塞翁失馬猶爲福。君不見野老八十無完衣。歲晚北風吹破屋。

記夢

夜夢有客短褐袍。示我文章雜詩騷。措辭磊落格力高。浩如怒風駕秋濤。起伏奔蹴何其豪。勢盡東注浮千艘。李白杜甫生不遭。英氣死豈埋蓬蒿。晚唐諸人戰雖鏖。眼暗頭白真徒勞。何許老將擁弓刀。遇敵可使空壁逃。肅然起敬豎髮毛。伏讀百過聲嘈嘈。惜未終卷雞已號。追寫尙足驚兒曹。

冬夜讀書

茂陵病後非平昔。瘦骨峩峩短髮疎。紅燭悔從長夜飲。青燈喜對少年書。聖賢親見生非晚。忿慾俱空死有餘。破屋頽垣君勿笑。更闌絃誦滿吾廬。

遊仙羅澗谷選放翁詩。有遊僊七言古詩一首。卽飄飄初珥玉殿三絕句合成者。附記于此。

飄飄鸞鶴杳難攀。萬里東遊海上山。應有世人遙稽首。紫簫餘調落雲間。

又

鳳舞鸞歌宴棗宮。碧桃花下醉千鍾。紅塵謫滿重歸去。花未開殘宴未終。

又

玄圃春風賜宴時。雙成獨奏玉參差。侍晨飲酎虛皇喜。一段龍綃索進詩。

又

初珥金貂謁紫皇。仙班最近玉爐香。爲憐未慣叢霄冷。獨賜流霞九醞觴。

又

玉殿吹笙第一仙。花前奏罷色悽然。憶曾偷學春愁曲。謫在人間五百年。

過鄰家

今日病良已。筇枝發興新。高居遺世事。一笑過吾鄰。夕照明丹葉。秋風老白蘋。素衣雖化盡。不爲犯京塵。

山園晚興

傳盃誰與豁幽襟。霜晚黃花未滿叢。過雁一聲寒靄外。短籬數掩夕陽中。易雖病裏猶能讀。詩到愁邊始欲工。惟有功名真已矣。嬾將華髮對青銅。

初冬出扁門歸湖上

桑柘枝空葉作堆。斜陽更著角聲催。雲歸玉笥茫茫去。水下蘭亭曲曲來。稻壟受犁寒欲遍。漁船入市晚爭回。貂裘破弊霜風冷。愁對青燈撥瓮醅。

新寒小醉睡起日已高戲作

倦眼矇矓睡易成。華胥稅駕不多程。衾重枕穩當霜夕。氈暖屏深擁宿醒。栩栩蝶魂閑自適。緜緜龜息靜無聲。幽棲豈是忘微祿。正怕條鈴擾五更。

太息

閑將白髮照清溝。太息年光逝不留。勳業無期著書晚。此生與世判悠悠。

冬夜讀書

平生喜藏書。拱壁未爲寶。歸來稽山下。爛漫恣探討。六經萬世眼。守此可以老。多聞竟何用。綺語期一掃。幽居出戶稀。衰病擁爐早。青燈照黃卷。作意勿草草。

晚步

地爐附殘火。將夕烏雀喧。食已了無事。扶杖閑出門。披披歸雲陣。淡淡新月痕。平生足憂患。歲晚信乾坤。緩步牛羊巷。浩歌桑柘村。九原不可作。吾意與誰論。

村舍

空谷人稀到。新寒病頓輕。晨霜催小獵。宿雨潤新耕。草莽秦馳道。雲煙越故城。千年不磨滅。惟有暮山橫。野步至近村。

隨意出柴荆。清寒作晚晴。風吹雁北鄉。雲帶月東行。童稚爭追逐。漁樵習送迎。白頭寧復仕。惟此餞餘生。

夜坐油盡戲作

金樽畫燭少年豪。白首孤燈不厭勞。夜漏雖深書未竟。半缸誰與續殘膏。

又

欲盡殘燈更有情。可憐剪斷讀書聲。區區紙上太癡計。一笑開門看月明。

歲暮

離離井上桐。鬱鬱牆下桑。零落豈不悲。無奈中夜霜。蟋蟀更可念。歲暮依客牀。客亦自孤寂。衣篝歇殘香。一燈挂西壁。耿耿青無光。援筆欲寫愁。三喟不成章。

幽居感懷

偶傍楓林結數椽。東歸也復度流年。汀洲雁下依殘水。墟里人行破夕煙。十月風霜欺客枕。五更鼓角滿江天。散關清渭應如昨。回首功名一愴然。

山中夜歸戲作短歌

駿馬不用換美妾。名酒不用博涼州。霜天飲酒騎馬出。馳獵蹴蹋川原秋。少年意薄萬戶侯。白首乃作窮山囚。箭鋒豈必盡狐兔。胸次聊欲平山丘。夜歸湖上酒初醒。莊舍蕭條燈火冷。解刀自笑太麤生。卻染松煤飛兔穎。

狂歌

少年雖狂猶有限。遇酒時能傲憂患。卽今狂處不待酒。混混長歌老巖澗。拂衣卽與世俗辭。掉頭不受朋友諫。挂帆直欲截煙海。策馬猶堪度雲棧。枵然癡腹肯貯愁。天遣作盎盛藜莧。髮垂不櫛性所便。衣垢忘濯心已慣。眼前故人死欲無。此生行矣風雨散。羞爲塵土伏轅駒。寧作江湖斷行雁。

遲暮

遲暮固多感。況此歲嶢嶢。霜霰忽已集。夜聞絡緯鳴。青燈不解語。依依有餘情。銅瓶煮寒泉。中作笙簫聲。沈憂能傷人。一夕白髮生。蓬萊渺雲海。金丹幾時成。

種秫

種秫供留客。移花待探春。愁邊開樂國。鬧裏作閑身。鬢髮今如此。頭顱莫問人。白鷗非避俗。野性自難馴。

擁爐

睡少人人笑。老生擁爐孤。坐欲三更月。移西去。失花影。風自北來傳漏聲。鳧鼎煎茶非俗物。雁燈開卷愜幽情。興來自喜猶彊健。一紙清詩取次成。

冬夜吟

昨夜凝霜皎如月。碧瓦鱗鱗凍將裂。今夜明月卻如霜。竹影橫窗更清絕。造物有意娛詩人。供與詩材次第新。飢鴻病鶴自無寐。山窮水絕誰爲鄰。西村梅花消息動。唧唧寒醅漸鳴瓮。儘將醉帽插幽香。此生莫作長安夢。

讀書罷小酌偶賦

歲晚淒涼冰雪晨。頽垣破屋鏡湖濱。浮生亦念古有死。壯氣要使胡無人。黃卷展殘三太息。綠尊酌罷一嘯伸。躬耕不預差科事。猶向清時作幸民。

移花遇小雨喜甚爲賦二十字

獨坐閑無事。燒香賦小詩。可憐清夜雨。及此種花時。

書生歎

君不見城中小兒計不疎。賣漿賣餅活有餘。夜歸無事喚僮侶。醉倒往往眠街衢。又不見壠頭男子手把

鉏丁字不識稱農夫。筋力雖勞憂患少。春秋社飲常歡娛。可憐秀才最誤計。一生衣食囊中書。聲名纔出衆毀集。中道不復能他圖。抱書餓死在空谷。人雖可罪汝亦愚。嗚呼人雖可罪汝亦愚。曼倩豈卽賢侏儒。冬夜醉解殘燈熒然起讀書。至明賦詩十韻。

冬夜厭久坐。頗幸一醉眠。滿酌文學尊。徑臥子敬甕。鼻雷未及作。眼電遽瞭然。孤燈如秋螢。喚我開陳編。初欲限一卷。隨手紛聯翩。歡然不知疲。忽已晨烏遷。嗟我行六十。衰病迫殘年。仕進今永塞。文章後誰傳。飽食而安寢。此計定自賢。勿學草玄翁。死爲人所憐。

夜行

路長憂炬盡。馬弱畏泥深。腸斷猿啼樹。魂驚鬼嘯林。艱危窮自惜。寒苦老難禁。回首金牛道。加鞭負壯心。須自小益還南鄭。夜宿金牛驛。時方大寒。人馬俱欲僵仆。今十二年矣。

遊淳化寺

蕭寺久不到。偶來幽興長。蝟穿珠九曲。蜂釀蜜千房。雨過山橫翠。霜新橘弄黃。年衰道不進。珍重一爐香。僧問拯迷。如何是祖師西來意。師曰。古殿一爐香。拯迷卽淳化也。

餘慶出遊夜歸

杖藜尋勝愜幽情。芒屨如飛病體輕。迎客野梅纔半吐。避人山雉尙徐行。東谿水落灘聲壯。南嶺雲酣雪意成。薄暮歸來僧已定。佛龕獨對一燈明。

遊前山

兀兀無歡意。閑遊未擬回。屐聲驚雉起。風信報梅開。山雪堆僧衲。溪流動蟄雷。平生一桐帽。自惜犯塵埃。
齋前獨坐戲作

閉戶學僧坐。頽然遺世情。虛窗鷓飛影。枯葉犬行聲。雪擁杉灰煖。雲垂紙帳明。清饑不可耐。一笑聽華鯨。
晚同僧至谿上

耽耽臥石熊。當道矯矯長松龍。上天不怕雪雲寒。到骨喚僧扶杖立橋邊。

僧飯

雲碓舂秬白。齋廚爨桂香。百窮慚燕頤。一飽慰龜腸。舉世知心少。平生爲口忙。何當棄簪笏。終老掩山房。

山店賣石榴取以薦酒

山色蒼寒雲釀雪。旗亭據榻興悠哉。麴生正欲相料理。催喚風流措措來。

平水小憩

蓐食草菴中。肩輿小市東。霧收山淡碧。雲漏日微紅。酒旆村場近。罾船浦溆通。平生喜行路。小住莫怱怱。

自若耶溪舟行杭鏡湖而歸

換馬亭前煙火微。鬪牛橋畔行人稀。雲山慘澹少顏色。霜日青薄無光輝。新酒鷓成桑正落。美人信斷雁空歸。高樓何處吹長笛。清淚無端又溼衣。

宴坐

鼓樂弦歌萬二千。天魔剩欲破幽禪。道人袖手心如水。一點紗燈夜悄然。

遊山歸偶賦

此生本寄一浮漚。歸臥茅茨又四秋。習氣未除惟痛飲。幻軀偶健且閑遊。買蓑山縣雲藏市。橫笛江城月滿樓。與世沈浮最安樂。莫思將相快恩讎。

六十吟

人生久矣無百年。六十七已爲壽。嗟予忽忽蹈此境。衰髮如蓬面枯瘦。孤松摧折老澗壑。病馬淒涼依棧豆。尙無籌策活目前。豈有功名付身後。壁疎風入燈焰搖。地爐火盡寒蕭蕭。胸中白虹吐千丈。庭樹葉空衣未纒。

舒悲

嗜酒苦猖狂。畏人還齷齪。老病始悔歎。天下無此錯。管葛逝已久。千古困俗學。捫蝨論大計。使我思景略。中原失枝梧。胡塵暗河洛。天道遠莫測。士氣伏不作。煌煌東觀書。無乃太寂寞。丈夫不徒死。可作一丘貉。歲晚計愈疎。撫事淚零落。

山園晚興

病骨初輕野興濃。閑扶拄杖夕陽中。草枯陂澤涓涓水。木落園林淅淅風。楊子淒涼老天祿。馬周顛顛領客新。豐壯心未與朱顏改。一笑憑高送斷鴻。

獨立

獨立柴荆外。頽然一秃翁。亂山吞落日。野水倒寒空。憂患工催老。飄零敢諱窮。漁歌亦何恨。悽斷滿西風。

探梅

半吐幽香特地奇。正如官柳弄黃時。放翁頗具尋梅眼。可愛南枝愛北枝。

又

江路雲低糝玉塵。暗香初探一枝新。平生不喜凡桃李。看了梅花睡過春。

遠興

莫言人世足悲傷。只爲詩情合斷腸。窗檻雨晴湖灩灩。郊墟煙重月茫茫。梅花調苦愁三弄。竹葉香清泥一觴。閉戶終年嗟局促。不如新雁到衡湘。

張功甫許見訪以詩堅其約

零落汀蘋露氣清。北窗昨夜已秋聲。書來屢有入東約。坐上極思虛左迎。激烈哦詩般金石。縱橫落筆走蛟鯨。吾曹此事期千載。老眼相逢剩要驚。

卷第十六

夜夢與數客觀畫有八幅龍湫圖特奇客請予作詩其上書數十字而覺不復能記明日乃追補之亦髣髴夢中意也

高堂閱畫娛嘉賓。巨幅小卷縱橫陳。其間一圖最傑作。命意落筆驚倒人。奇峯峭立插地軸。飛瀑崩瀉垂天紳。壽藤老木幻荒怪。深潭危棧愁鬼神。忽然白晝起雷電。始覺異物蟠淵淪。陰雲四興誅老魅。甘澍連

夕蘇疲民。豈惟陂澤苗盡立。已活億萬介與鱗。文章與畫共一法。腕力要可回千鈞。錙銖不到便懸隔。用意雖盡終苦辛。君看此圖凡幾筆。一一圓勁如秋尊。乃知世間有絕藝。天造草昧參經綸。吾言未竟且復止。剩發幽奧天公嗔。

泛舟

女牆鬱鬱帶斜暉。短棹還從剡曲歸。木葉經霜渾欲盡。人家近水自相依。逢迎俗客言多忤。顛沛窮途計易非。雪裏閉門殊不惡。故貂雖弊勝無衣。

夜聞大風感懷賦吳體

故都宮闕汗羶腥。原野久稽陳大刑。未須校尉戍西域。先要將軍空朔庭。意言揮戈可退日。身乃讀書方聚螢。病起窗前髮如雪。夜聞風聲孤涕零。

骨相

骨相元知薄。功名敢自期。病侵彊健日。閑過聖明時。形勝輪臺地。飛騰瀚海師。江湖雖萬里。猶擬綴聲詩。

有感

書生事業絕堪悲。橫得虛名毀亦隨。怖懼幾成牀下伏。艱難何啻劍頭炊。貸監河粟元知誤。乞尉遲錢更覺癡。已卜一菴鵝鼻谷。鵝鼻谷在秦望山。秦刻石之所。崖嶺巉峻。可無芝木療朝飢。

又

讀遍名山萬卷藏。殘年肯受俗低昂。正須嘯詠風濤上。未至悲辛酒肉旁。夢裏功名誰復計。閑中日月不

勝長。虛皇有詔君知否。盡賜江湖作醉鄉。

城西晚眺

嫋嫋城笳咽。熒熒漁火青。霜凋兩岸柳。水浸一天星。靜看船歸浦。遙聞雁落汀。倚闌幽興極。不敢恨飄零。

苦寒

凍硯時能出苦吟。濁醪亦復慰孤斟。誰知冰雪凝嚴候。自是乾坤愛育心。癘鬼盡驅人意樂。遺蝗一洗麥根深。但嫌景短妨書課。棲鳥紛紛又滿林。

夙興

病後精神殊未減。披衣每起待晨雞。愛書不厭如平壑。戒酒新嚴似築堤。莫歎茅茨常局促。猶勝簿領苦沈迷。迎長漸近丹當熟。已覺溫溫下徹臍。

冬夜讀書甚樂偶作短歌

衰病作書祟。常恨無新功。兔甌供茗粥。睡思一洗空。郊居近城闕。漏鼓傳瑟瑟。緗帙開爛漫。牙籤紛疊重。朱黃參筆墨。照映燈花紅。魯壁汲冢祕。天遣慰困窮。衰衣窺藻火。宗廟聽笙鏞。端居得至樂。生世豈不逢。藜羹冷未啜。短褐忘嚴冬。拜手謝造物。不須黑頭公。

冬夜月下作

造物寧能因此翁。浩歌庭下答松風。煌煌斗柄插天北。焰焰月輪生海東。皂纛黃旗都護府。峨冠長劍大明宮。功名晚遂從來事。白首江湖未歎窮。

感憤

今皇神武是周宣。誰賦南征北伐篇。四海一家天歷數。兩河百郡宋山川。諸公尙守和親策。志士虛捐少壯年。京洛雪消春又動。永昌陵上草芊芊。

蓬戶

蓬戶真堪設爵羅。歲時野老自相過。人情靜處看方見。詩句窮來得最多。枕上長歌時激烈。樽前一笑且婆娑。白頭萬事都經遍。莫爲悲傷損太和。

行後園

霜風吹枯桑。落葉乾有聲。陂池日已涸。沙水見底清。人生非金石。歲暮難爲情。安得天邊鶴。駕之以遐征。曉出遇獵徒。行作

出門萬瓦粲晨霜。忽憶行軍起裹創。賣劍買牛身已老。褰旗斬將夢猶狂。奇才古有潛屠肆。豪氣今誰寓獵場。狐兔草間何足問。合留長箭射天狼。

贈道侶

崎嶇世路久知難。準擬丹成玉鍊顏。十載尋人遍巖穴。一樽隨處對溪山。蘇門晝寂聞舒嘯。函谷秋清候度關。剩欲相招同此事。疑君未辦一生閑。

六言

功名正恐不免。富貴酷非所須。鐵馬未平遼碣。釣船且醉江湖。

又

噉飯一簞不盡。結廬環堵猶寬。常得奉祠玉局。不須草詔金鑾。

又

烏有翁邊貰酒。無何鄉裏尋花。把定東風一笑。今年別是生涯。

又

壯歲京華羈旅。暮年湖海清狂。勿倚新知可樂。笑中白刃如霜。

作雪未成自湖中歸寒甚飲酒作短歌

黑雲垂到地。飛霰如細礫。我從湖上歸。散髮醉吹笛。少年志功名。目視無堅敵。慘淡古戰場。往往身所歷。寧知事大謬。白首猶寂寂。淒涼武侯表。零落陳琳檄。報主知何時。誓死空憤激。天高白日遠。有淚無處滴。

題傅神

鹽車心愧渥洼姿。邂逅風雲妄自期。鬻雪豈無歸漢日。飯牛猶有相齊時。君看短褐琴橫膝。誰許峨冠劍拄頤。白髮蕭蕭雖憊矣。時來或將渡遼師。李英公平遼東時已八十餘。

閏月三夜舍西觀新月

平生絕愛初三月。況是平池浸玉鈎。老去人間朋舊少。一樽誰與話清愁。

獨夜

城上長更續短更。江平天迴雁方征。燈明紙帳雪霜色。火熟銅瓶風雨聲。濁酒未傾心已怯。細書時讀眼

猶明蕭然一室平生慣。蠹下何須擁萬兵。

晚出偏門

一段新愁帶宿醒。半欹烏帽策驢行。村墟香動梅初破。裘褐寒輕雪未成。渡口人爭紅日晚。沙邊雁帶碧煙橫。悠然又覓長堤路。腸斷城樓畫角聲。

薏苡蜀人謂其實爲薏米。唐安所出尤奇。

初遊唐安飯薏米。坎成不減雕胡美。大如芡實白如玉。滑欲流匙香滿屋。腹腴項鬪不入盤。況復殮酪誇甘酸。東歸思之未易得。每以問人人不識。嗚呼奇材從古棄。草菅君試求之籬落間。

答鄭虞任檢法見贈

臥龍山前秋雨晴。鄭子過我如夙昔。照人眉宇寒巉巖。懸知筆有千鈞力。鏡湖歲暮霜葉空。乃聞載酒同諸公。歸來湖山皆動色。新詩一紙吹清風。文章要須到屈宋。萬仞青霄下鸞鳳。區區圓美非絕倫。彈丸之評方誤人。

舟中曉賦

小艇下滄浪。吳歌特地長。斜分半艙月。滿載一篷霜。香甌炊菰白。醇醪點蟹黃。宦遊元爲口。莫恨老江鄉。

野興

玉門關外何妨死。飯顆山頭不怕窮。春瓮已成花欲動。了無一事著胸中。

又

猿臂將軍老未衰。氣吞十萬羽林兒。南山射虎自堪樂。何用封侯高帝時。

月夜有感

炯炯水輪升。澹澹玉宇碧。高樓傾美酒。一醉不容失。陸生獨何事。閉戶飽岑寂。年來負風月。豈止此一夕。平生酒邊身。欲老每自惜。夜闌耿不寐。浩歌出金石。

落魄

落魄東吳莫笑儂。今年要不負春風。閑愁擲向乾坤外。永日移來歌吹中。酒浪欲爭湖水綠。花光卻妒舞衫紅。公卿憂責如山重。肯信人間有放翁。

遣興

壯年一箭落雙鷗。野餉如今插藥苗。寒與梅花同不睡。悶尋鸚鵡說無繆。烏絲闌上詩初就。綠綺聲中酒半消。老去可憐風味在。未應山海混漁樵。

湖村野興

十里疎鐘到野堂。五更殘月伴清霜。已知無奈姮娥冷。瘦損梅花更斷腸。

又

山色空濛雨點微。醉中不覺濕蓑衣。何妨乞與丹青本。一棹橫衝翠靄歸。

看鏡

局促人間百不如。每看清鏡歎頭顱。醉來風月心雖在。老去軒裳夢已無。棋劫正忙停晚餉。詩聯未穩畫

寒爐乘除尙喜身彊健。六十登山不用扶。

塞上

塞上今年有事宜。將軍承詔出全師。精金錯落八尺馬。刺繡鮮明五丈旗。上谷飛狐傳號令。蕭關積石列城陣。不應幕府無班固。早晚燕然刻頌詩。

舟過會稽山下因繫舟遊近村迨暮乃歸

六十齒髮衰。歲月如逝波。秦王酒瓮邊。知復幾經過。欣然捨書檝。仄步捫青蘿。一徑入幽谷。四面聞樵歌。白雲忽破碎。翠木相蕩靡。湫湫春塘滿。柳陰戲雙鵝。浮生百憂中。此樂顧豈多。日暮吾其歸。已恐爛斧柯。

人日偶遊民家小園有山茶方開

人日西郊路。晨光射淺灘。停橈喜蕭散。照影歎衰殘。社酒香浮瓮。春蔬綠滿盤。山茶雖慰眼。不似海雲看。成都海雲寺山茶花。一樹千苞。特爲繁麗。

過杜浦橋

橋外波如鴨頭綠。杯中酒作鵝兒黃。山茶花下醉初醒。卻過西村看夕陽。

又

橋北雨餘春水生。橋南日落暮山橫。問君對酒胡不樂。聽取菱歌煙外聲。

上元日晝臥

積雨連上元。孤愁臥空館。宿醒殊未解。欲起意復嬾。牀敷蠻氍毹。被擁吳綾暖。殘香碧縷細。軟火紅焰短。

雖云少睡眠。聊喜屢展轉。昏昏忽已暮。一笑呼茗椀。

莊器之作招隱閣項平父諸人賦詩予亦繼作

諸公共賦反招隱。細字斜行肯見傳。語到淮南小山作。人如江左永和年。一窗蘿月禁春瘦。萬壑松風撼晝眠。我亦尙嫌林谷淺。因君更擬斷雲煙。

春夜讀書感懷

荒林鼻獨嘯。野水鵝羣鳴。我坐蓬窗下。答以讀書聲。悲哉白髮翁。世事已飽更。一身不自恤。憂國涕縱橫。永懷天寶末。李郭出治兵。河北雖未下。要是復兩京。三千同德士。百萬羽林營。歲周一甲子。不見胡塵清。賊酋實孱王。賊將非人英。如何天此時。坐待姦雄生。我死骨卽朽。青史亦無名。此詩尙不作。丹心尙誰明。

宿能仁寺

小雨暗江城。倦客寄僧榻。孤燈如秋螢。清夜自開闔。遙憐萍青青。厭聽鼕閣閣。窗明竟無寐。卯酒倒殘榼。

寄題方伯蕃遠菴

方侯胸中負經濟。議論源源有根柢。借令不用老山林。尙欲著書垂萬世。百年苦短萬世長。榮利一時真聚斲。渠曹定自別肺肝。今夕不爲明旦計。

雨中宿石帆山下民家

老覺山行倦。閑便水宿幽。雨泥看放鴨。煙草聽呼牛。槃箸煩頻勸。窗扉喜小留。餘年竟何事。高枕送悠悠。中夜雨霽月色入戶起飲酒一杯作絕句

吹盡浮雲天宇清。城頭疊鼓報三更。平生無此一杯酒。玉筍峯頭看月生。玉筍峯在石帆之南。

贈石帆老人

地僻林深客到稀。高春未起閉柴扉。新松鬱鬱三千本。密竹蕭蕭一尺圍。溪叟旋分菰米滑。山童新采蕨芽肥。因君更作長閑想。麟閣雲臺竟是非。

溪上醉吟

行行不知溪路深。但怪素月生遙岑。不辭醉袖拂花絮。與子更醉青羅陰。

囚山

垣屋參差綠樹邊。囚山光景餞華顛。平川極目思秦地。大澤浮空憶楚天。刺虎射麋俱已矣。舉杯開劍忽悽然。此生終遣英雄笑。棘沒銅駝六十年。

小園

松菊僅三畝。作園真彊名。馴禽驚不去。熟果墜無聲。倦就盤陀坐。閑拈柳栗行。茅亭亦疎豁。憑檻看春耕。鄉人或病予。詩多道蜀中。遨樂之盛適。春日遊鏡湖。共請賦山陰。風物遂卽杯酒間。作四絕句。卻當持以誇西州故人也。

嫩日輕雲淡。拖天撲燈過。後賣花前。便從水閣。杭湖去。捲起朱簾。上畫船。

又

舫子窗扉面面開。金壺桃杏間尊罍。東風忽送笙歌近。一片樓臺泛水來。

又
湖波綠似鴨頭深。一日春晴直萬金。好事誰家鬪歌舞。方舟齊榜出花陰。

又

花光柳色滿牆頭。病酒今朝懶出遊。卻就水亭開小宴。繡簾銀燭看歸舟。

病中

風雨暗江天。幽窗起復眠。忍窮安晚境。留病壓災年。客助修琴料。僧分買藥錢。餘生均逆旅。未死且陶然。

病起

開歲忽六十。病餘閑炷香。春光向客淡。夜漏爲愁長。已老鷄豚社。永違鷓鴣行。蒼龍西角月。孤夢墮微茫。

小築

小築茅茨鏡水濱。天教靜處著閑身。平原不復賦豪士。甫里但思歌散人。翠壁微泉時的鑿。衡門疊嶂曉嶙峋。子虛誤辱諸公賞。萬里輕鷗豈易馴。

記夢

東吳春暮寒猶重。睡美不聞城角動。身雖衰惰怕出門。江山尙入幽窗夢。夢到青羊看修竹。道人告我丹將熟。試求一黍換肝腸。他日重來駕黃鵠。青羊宮在成都南門外浣花道中。

久雨排悶

一春略無十日晴。雨腳纔斷雲已生。奇葩摧敗等青覓。嘉穀漂蕩隨浮萍。書生病臥苔及榻。溼薪燎衣熏

欲盲腰頑足痺空歎息。咫尺不得行中庭。讀書窗黑不見字。彈琴絃緩那成聲。老盆濁酒且復醉。兩部鼓吹方施行。

雨中泊舟蕭山縣驛

端居無策散閑愁。聊作人間汗漫遊。晚笛隨風來倦枕。春潮帶雨送孤舟。店家菰飯香初熟。市擔蓴絲滑欲流。自笑勞生成底事。黃塵陌上雪蒙頭。

夜漏欲盡行度浮橋至錢清驛待舟

潮生抹沙岸。雲薄漏月明。江頭曉色動。鴉起人未行。扶攜度長橋。仰視天宇清。遙憐繫舟人。聽我高屐聲。水檻得小憩。一笑拄杖橫。澄漪弄孤影。微風吹宿醒。浩然方寸間。不受塵事撓。寄語市朝人。此樂未易名。

江頭十日雨

江頭十日雨。雨止春已盡。殘紅如掃空。草木皆綠潤。村墟櫻筍鬧。節物團粳近。可憐笠澤翁。百憂集雙鬢。賦詩空自清。學道了不進。林間一甌茶。晤語君勿吝。

柯橋客亭

小市初晴已過春。朱櫻青杏一番新。灞陵老子無人識。暫借郵亭整角巾。

又

梅子生仁燕護雛。透簷新葉綠扶疎。朝來酒興不可耐。買得釣船雙鱖魚。

小雨舟過梅市

故故催詩襯雨蓬。悠悠破夢隔雲鐘。遙看漁火兩三點。已過暮山千萬峯。老矣自應埋病骨。歸哉莫念抗塵容。停橈小住青楓岸。吳市高人黨可逢。

曉枕

曉枕鶯聲帶夢聽。忽看淡日滿窗櫺。閑愁誰遣濃如酒。醉過殘春不解醒。

巢菜并序

蜀蔬有兩巢。大巢豌豆之不實者。小巢生稻畦中。東坡所賦元修菜是也。吳中絕多名。漂搖草一名野蠶豆。但人不知取食耳。予小舟過梅市得之。始以作羹。風味宛如在醴泉。蠶頤時也。冷落無人佐客庖。庾郎三九困譏嘲。此行忽似蠶津路。自候風爐煮小巢。

吳娘曲

鏡奩蠶出千黑蟻。釵梁梅小雙青豆。吳娘十四未知愁。羅衣已覺傷春瘦。閑尋女伴過西家。鬪草歸來日未斜。睡睫濛濛嬌欲閉。隔簾微雨壓楊花。

感舊

醉眼常輕兒女曹。西遊對客尙能豪。縷金羯鼓龜茲樂。鏤玉琵琶邏娑槽。巫峽已回行雨夢。錦江空憶浣花遊。閑情何計都除盡。爲覓并州快剪刀。

晨起閑步

飛紅掠地送春忙。嫩綠成陰帶露香。聽徹曉天鶯百轉。卻隨飛蝶度橫塘。

初夏同桑甥世昌過鄰家

空谷舊生涯。蕭條只自嗟。妻饑嗔護筍。兒病失澆花。赤米老能飽。濁醪貧可賒。徵科幸差簡。扶杖過鄰家。

寓歎

孤生拙料事。諸老誤知人。世故幾翻覆。此身常賤貧。有書藏禹穴。無地靜胡塵。衰病今年劇。呻吟欲過旬。

春夏雨暘調適頗有豐歲之望喜而有作

二十年無赤白囊。人間何地不耕桑。陂塘處處分秧遍。村落家家煮繭忙。野老逢年知飽煖。書生隨例得猖狂。雨餘天氣初清潤。曳履長歌出草堂。

聞虜酋遁歸漠北

幽州遺民款塞來。來者扶老攜其孩。共言單于遠逃遁。一夕荆棘生燕臺。天威在上賊膽破。捧頭鼠竄吁可哀。妄期舊穴得孳育。不知天網方恢恢。老上龍庭豈不遠。漢兵一炬成飛灰。陛下中興天所命。築壇授鉞皆雄才。煌煌九霄揭日月。浩浩萬里行風雷。號山多獸可遊獵。汝不請命何歸哉。

初夏遊凌氏小園

水滿池塘葉滿枝。曲廊危榭愜幽期。風和海燕分泥處。日永吳蠶上簇時。閑理阮咸尋舊譜。細傾白墮賦新詩。從來夏淺勝春日。兒女紛紛豈得知。庾信詩云。夏淺卻勝春。鏡湖遊人至立夏而止。

偶得北虜金泉酒小酌

草草杯盤莫笑貧。朱櫻羊酪也嘗新。燈前耳熱顛狂甚。虜酒誰言不醉人。高適詩云。胡兒十歲能騎馬。邊

酒千盃不醉人。

又

逆胡萬里跨燕秦。志士悲歌淚滿巾。未履胡腸涉胡血。一樽先醉范陽春。

無題

珠鞦玉指擘箜篌。誰記山南乘燭遊。結綺詩成江令醉。囊泉夢斷沈郎愁。天涯落日孤鴻沒。鏡裏流年兩鬢秋。不用更求驅豆術。人生離合判悠悠。

戲贈

簾幕陰陰晝漏遲。鵝黃雪白絡新絲。只應笑殺東鄰女。不見鞦韆到拆時。

題少陵畫像

長安落葉紛可掃。九陌北風吹馬倒。杜公四十不成名。袖裏空餘三賦草。車聲馬聲喧客枕。三百青銅市樓飲。杯殘鬻冷正悲辛。仗內鬪雞催賜錦。

閑居書事

園林綠葉一番新。桃李吹成陌上塵。玩易焚香消永日。聽琴煮茗送殘春。隱居正欲求吾志。大患元因有此身。堪笑癡人營富貴。百年贏得冢前麟。

登臺遇雨避於山亭晚霽乃歸

溽暑不堪蝸舍陋。瘦藤扶我上危臺。搏禽俊鶻橫空去。卷雨狂風掠野來。壯觀深知化工妙。幽尋卻蹋夕

陽回悠然有喜君知否。屐齒留痕遍綠苔。

村居書觸目

雨霽郊原刈麥忙。風清門巷曬絲香。人饒笑語豐年樂。吏省徵科化日長。枝上花空閑蝶翅。林間蕚美滑鶯吭。飽知遊宦無多味。莫恨爲農老故鄉。

訪醫

衰與病相乘。況復積憂慮。眩昏坐輒瞑。疲弱行欲仆。今晨訪之醫。見語疾當去。脈來如泉源。未易測君數。盛衰當自察。信醫固多誤。養氣勿動心。生死良細故。

夏夜讀書自嘲

事業無成去日逾。只今身世付滄洲。風煙慘慘菰蒲老。星斗離離河漢流。寂寞書生學奇字。窮愁客子著春秋。白頭自苦君無笑。骨朽成塵志未休。

夏日小宴

橫吹銅笛蒼龍聲。雙奏玉笙丹鳳鳴。已判百年終醉死。要將一笑壓愁生。旋移畫舫破山影。高捲朱簾延月明。試問炎歊在何許。夜闌翻怯葛衣輕。

送紫霄女道士四明謝君

一別南充十四年。時時清夢到金泉。山陰道上秋風早。卻見神仙小自然。果州金泉山謝自然飛昇之地。

又

道骨仙風凜不羣。清秋采藥到江村。自言家住雲南北。知是遺塵幾世孫。

醉中夜自村市歸

村市夜騎黃犢還。卻登小閣倚闌干。銀河斜界曉天碧。璧月下入秋江寒。吾輩身閑且飲酒。人生事定須闔棺。元自胸中著雲夢。莫驚綠鬢耐悲歡。

城北夜

端居厭孤寂。偶繫北城舟。天地淒涼色。江湖汗漫遊。螢光矜暗夜。蟲語報新秋。老去功名意。青燈映布裯。

秋夜舟中作

沽酒黃葉村。炊飯紅蓼岸。居人不孰何。正作漁父看。漁父我所羨。尙恐不得作。讀書端自癡。遊宦亦何樂。四顧澤茫茫。仰視天離離。長歌入雲去。月落斗未欹。

日晚散步湖上遇小雨

暮色蒼蒼日初落。寒聲策策風正作。湖邊倚杖隄上行。病起聊試遊山腳。平生出門輕萬里。老去謝客專一壑。風濤傾洞蛟鰐橫。閭闔崔嵬鬼神惡。春蕪二頃吐黃犢。老學爲農元不錯。兜鍪蟬冕俱掃空。雨笠香新織青箬。

安期篇

我昔遊岷峨。捫蘿千仞峯。丈人倚赤藤。恐是安期翁。贈我一丸藥。五雲出瓢中。服之未轉刻。瑩然冰雪容。素手掬山靄。綠髮吹天風。丈人顧我喜。共騎一蒼龍。蓬萊亦何求。愛此萬里空。卻來過齊州。螳蜋看青嵩。

曉望海山

暮山青尙淺。曉山如黛染。開窗望海山。天清霧方斂。向來六月中。黑雲齊如截。蒼龍下曳尾。卷雨灑炎熱。造物信老手。忽作萬里秋。刻削此孤峭。巖然消客愁。豈無一布帆。寄我浩蕩意。會當駕長風。清肅遺世事。

山園草木四絕句

紫薇

鐘鼓樓前官樣花。誰令流落到天涯。少年妄想今除盡。但愛清樽浸晚霞。

黃蜀葵

開時閑淡斂時愁。蘭菊應容預勝流。剩欲持杯相領略。一庭風露不禁秋。

拒霜

滿庭黃葉舞西風。天地方收肅殺功。何事獨蒙青女力。牆頭催放數苞紅。

蓼花

十年詩酒客刀州。每爲名花秉燭遊。老作漁翁猶喜事。數枝紅蓼醉清秋。

賽神曲

叢祠千歲臨江渚。拜謁今年那可數。須晴得晴雨得雨。人意所向神輒許。嘉禾九穗持上府。廟前女巫遞歌舞。嗚嗚歌謳坎坎鼓。香煙成雲神降語。大餅如槃牲腍肥。再拜獻神神不違。晚來人醉相扶歸。蟬聲滿廟鎖斜暉。

夜中起讀書戲作

髮已凋零齒已疎。忍飢白首臥蝸廬。風聲忽轆蓬窗過。夜半呼燈起讀書。

又

滅虜區區計本疎。水邊喬木擁茅廬。九原定發韓公笑。至老依然一束書。

秋夜出門觀月

六十衰翁適得閑。一秋無事掩柴關。雁來慘淡沙場外。月出蒼茫雲海間。飲酒已衰猶愛客。著書初畢可藏山。此生終羨漁家樂。小艇常衝夕靄還。

雨中買酒鏡湖酒樓

陰風號大澤。暮雨上高樓。愁憶新豐酒。寒思季子裘。登臨天地迤。老病歲時遒。安得急裝去。北平防盛秋。

聞虜政衰亂掃蕩有期喜成口號

正朔今年被百蠻。遙知喜色動天顏。風雷傳號臨春水。春水虜都名。貔虎移軍過玉關。博士已成封禪草。單于將就會朝班。孤臣老抱周南恨。壯觀空存夢想間。

又

遺虜遊魂豈足憂。漢家方運幄中籌。天開地闢逢千載。雷動風行遍九州。刁斗令嚴青海夜。旌旗色照鐵關秋。功名自是英豪事。不用君王萬戶侯。

甲辰中秋無月十七夜獨曠然達旦

老覺人間無一欣。窮閣掃軌謝紛紛。已憑白露洗明月。更遣清風收亂雲。棲鵲揀枝寒未穩。斷鴻呼伴遠猶聞。病羸慵踏梧桐影。倚柱長吟夜向分。

悲秋

病後支離不自持。湖邊蕭瑟早寒時。已驚白髮馮唐老。又起清秋宋玉悲。枕上數聲新到雁。燈前一局欲殘棋。丈夫幾許襟懷事。天地無情似不知。

農家秋晚戲詠

鞭地如鏡築我場。破礮玉粒輸官倉。九月野空天欲霜。甌中初喜新粳香。舍邊蕭蕭落葉多。野蠶出繭飛黃蛾。寒蔬種罷醉且歌。隻雞短紙賽園婆。

病中作

老鶴遼天興未窮。此生光景自匆匆。家爲逆旅相逢處。身在嚴裝欲發中。澀眼尙于書有味。孤愁殊覺酒無功。揮戈草檄今誰記。歲晚江邊白髮翁。

秋夜讀書

讀書喜夜長。著書悲齒暮。平生企前哲。凜有庸人懼。吾廬大澤中。地曠北風怒。徂年凋草木。寒氣逼霜露。燈昏老眼闇。鈍馬行惡路。投枕卷未終。吾衰歎非故。

病起

頽垣破屋暗藜蒿。病起不知秋已高。晨倚山楹羣木脫。暮臨苔砌百蟲號。力殫編簡初何得。腰折塵埃只

漫勞賴有濁醪生耳熱。狂歌醉草寄吾豪。

晨起

孤夢忽自驚。小窗初送明。珍禽語庭樹。可愛不知名。向者事宦遊。塵土過半生。傳呼束帶出。瑟瑟尙殘更。山居雖自由。晨起亦有程。洗硯拂書几。一笑愜幽情。

秋夜

老病龍鍾不入城。濁醪麤飯餞餘生。未霜村舍秋先冷。無月江天夜自明。出塞雖慙平賊手。下帷聊喜讀書聲。山童睡熟青燈暗。自撥殘爐候藥鑪。

雨中過東村

小雨空濛物象奇。偶扶藤杖過東陂。墊巾風度人爭看。蠟屐年光我自悲。窮鬼有靈揮不去。死魔多力到無期。歸來笑向麈門說。且了浮生一首詩。

山寺

寺門壓石危欲崩。槎牙老松挂蒼藤。風傳上方出定磬。雨暗古殿長明燈。宿林野鶻驚復起。爭栗山童呼不應。谿南聞道更幽絕。明日裂布縫行縵。

天王廣教院在叢山東麓。予年二十餘時與老僧惠迪遊。略無十日不到也。淳熙甲辰秋。觀潮海上。偶繫舟其門。曳杖再遊。恍如隔世矣。

遊山如讀書。深淺皆可樂。道邊小精舍。亦自一丘壑。淒涼四十年。始復重著腳。老僧逝已久。講座塵漠漠。

當時童子輩。衰鬢亦蕭索。掃壁觀舊題。歲月真電雹。文章卑不傳。衣食窘如昨。出門意惘然。遼海渺孤鶴。

江月歌

放翁平生一釣船。秋水未落江渺然。露洗玉宇清無煙。月輪徐行萬里天。人間聲利何足捐。浩歌看月冷不眠。孤鶴掠水來翩翩。似欲駕我從此仙。我寓紅塵今幾年。俛首韁鎖常自憐。樂哉揮手過月邊。西風未凋玉井蓮。

初寒書懷

嵩雲緜月本閑人。誤落塵中白髮新。萬事看山差入眼。百年把酒獨關身。棧邊老馬行安往。牀下寒龜息自勻。藜杖一枝猶好在。未妨閑探早梅春。

歲暮

小築幽栖與拙宜。讀書寫字伴兒嬉。已無歎老嗟卑意。卻喜分冬守歲時。羹臠芳鮮新弋雁。衣襦輕暖自繅絲。農家歲暮真堪樂。說向公卿未必知。

晨興

倦枕厭寒夜。起尋殘火温。啾啾衆雞動。耿耿一燈昏。野氣增霜力。窗光淡月痕。早朝非老事。且復灌吾園。

村飲

少年喜任俠。見酒氣已吞。一飲但計日。斗斛何足論。綠草滿雉場。紅旗植毬門。三叫落烏幘。倒瀉黃金盆。銀爐熾獸炭。狐兔紛炮燔。浩歌撼空雲。壯志排帝閭。回首今幾時。去日如車奔。朱顏辭曉鏡。白髮老孤村。

鄰翁勸黍酒。稚子供魚殮。功名信已乎。萬事付乾坤。

夜半讀書罷出門徙倚久之歸賦長句

浩歌曳杖出柴扉。不管三更露溼衣。擬看林梢殘月上。偶逢浦口斷雲歸。驚鴻脫網寒相倚。飢鶻思巢夜亦飛。卻掩北窗誰晤語。聊憑香盃洗塵鞿。

曝書偶見舊稿有感

日滿晴軒理蠹魚。壯遊回首一欷歔。淒涼王粲從軍作。零落相如諫獵書。歌吹恍思登北固。弓刀誰記渡南沮。虎頭本欠功名相。歸老林間計未疎。

崑崙行

陰雲解駁朝暎紅。黃河直與崑崙通。不駕鸞鳳驂虬龍。徑躡香煙上空中。吾行忽過日月宮。下視積氣青濛濛。寒暑不分晝夜同。嵯峨九關常烈風。凜然蕭森變冲融。不悸不眩身如空。塵沙浩劫環無窮。詎須更覓安期翁。

一室

九萬笑鵬搏。幽居一室寬。雨聲便早睡。酒力壓新寒。嬾覺閑多味。衰知死有端。此生吾自斷。不必夢邯鄲。

得所親廣州書

音信連年恨不聞。書來細讀卻消魂。人稀野店山魘語。路僻蠻村荔子繁。毒草自搖春寂寂。瘴雲不動晝昏昏。此生相見應無日。且置清愁近一樽。

幽居戲詠

清泉遶屋竹連牆。回首微官意已忘。小瓮帶泥收洛筍。洛中冬筍貯以小瓮爲遺饋。細鱗穿柳買河魴。黃旗萬里無侯骨。紅燭千鍾有酒腸。欲起九原誰可友。蘭亭修禊晉諸王。

幽事

蕭然四壁野人家。幽事還堪對客誇。快日明窗閑試墨。寒泉古鼎自煎茶。桐凋無復吟風葉。蘋老猶殘泣露花。萬里封侯眞已矣。只將高枕作生涯。

卷第十七

初冬雜題

勛業文章意已闌。暮年不足是看山。江南寺寺樓堪倚。安得身如杜牧閑。

又

莫嫌風雨作新寒。一樹青楓已半丹。身在范寬圖畫裏。小樓西角剩憑闌。

又

風橫雲低雨腳斜。一枝柔艣暮咿啞。昏昏醉臥知何處。推起船篷忽到家。

又

五斗安能解醉醒。嘗騰睡眼怯窗明。策勛賴有春芽在。臥聽山童轉磴聲。

又
荒郊寒雨晚淒淒。四壁穿頰旋補泥。物我元須各安穩。自苦牛屋織雞棲。

又

風雨聲豪入夢中。不知身世寄孤蓬。狐裘氈帽如龍馬。天漢西南小益東。

閉戶

屏居無一事。閉戶常經旬。勿云草舍陋。愛此油窗新。三日不作詩。幽禽語撩人。尺素雜行草。往檄江梅春。

十月四日夜記夢

四客聯轡來。我醉久不知。倒衣出迎客。媿謝前致辭。客意極疎豁。大笑軒鬚眉。禮豈爲我設。度外以相期。袞袞吐雄辯。泠泠誦新詩。共言攜酒壺。埽地臨前墀。意氣相顧喜。忽如少年時。老雞不解事。喚覺空嗟咨。涉世四十年。賢雋常追隨。爾來風俗壞。動脚墮險巇。森然義府刀。誰爲叔度陂。起作四客篇。捕影吾其癡。

西路口山店

日薄霜清十月天。馬蹄聲裏送流年。店當古路三叉處。山似孤雲兩角邊。孤雲兩角在漢中。淹泊自悲窮。不醒。衰殘更著病相纏。榆關瀚海知何在。目送飛鴻入暮煙。

題海首座俠客像

趙魏胡塵千丈黃。遺民膏血飽豺狼。功名不遣斯人了。無奈和戎白面郎。

送綽姪住菴吳興山中

一盃淡粥不烹蔬。裨居山。粥飯外。菜亦不食。自占雲根結草廬。非佛非心猶坐斷。定知不看夾山書。

又

湖海相從十日留。頗哀老子鬢驚秋。目光猶射車牛背。不用殷勤舉話頭。

冬夜與溥菴主說川食戲作

唐安薏米白如玉。漢嘉楫脯美勝肉。大巢初生蠶正浴。小巢漸老麥米熟。龍鶴作羹香出釜。木魚淪菹子盈腹。未論索麩與饋飯。最愛紅糟并魚粥。東來坐閱七寒暑。未嘗舉箸忘吾蜀。何時一飽與子同。更煎土茗浮甘菊。

仗錫平老自都城回見訪索怡雲堂詩

東華軟塵飛撲帽。黃金絡馬人看好。渠儂胸中誰得知。畏禍憂讒鬢先老。舉世輪與平元衡。青山白雲過一生。出門曳杖使千里。白雲不約常同行。敲門剝啄雲沒履。劇談未竟還東去。到山分我一片雲。併遣春風吹好句。

野飲

青山千載老英雄。濁酒三盃失阨窮。訪古頽垣荒塹裏。覓交屠狗賣漿中。平堤漸放春蕪綠。細浪遙翻夕照紅。已把殘年付天地。騎牛吹笛伴村童。

樊江觀梅

莫笑山翁老據鞍。探梅今夕到江干。半灘流水浸殘月。一夜清霜催曉寒。倚醉更教重秉燭。怕寒元自怯

憑欄誰知攜客芳華日。曾費纏頭錦百端。成都合江園芳華樓下梅最盛。

山亭觀梅

與梅歲歲有幽期。忘卻如今兩鬢絲。乘淡月時和雪看。斲蒼苔地帶花移。先春瘦損應多恨。靜夜香來更一奇。醉倒欄邊君勿笑。明朝紅萼綴空枝。

射的山觀梅

射的山前雨墊巾。籬邊初見一枝新。照谿盡洗驕春意。倚竹真成絕代人。餐玉元知非火食。化衣應笑走京塵。卽今畫史無名手。試把清詩當寫真。

又

凌厲冰霜節愈堅。人間乃有此癯仙。坐收國士無雙價。獨立東皇太一前。此去幽尋應盡日。向來別恨動經年。花中竟是誰流輩。欲許芳蘭恐未然。

別梅

竹籬數掩傍魚磯。萬點梅花掠地飛。正喜巡簷來索笑。已悲臨水送將歸。影橫月處愁空絕。子滿枝時事更非。自古情鍾在吾輩。尊前莫怪淚沾衣。

憶梅

護惜常愁滿樹開。況無一片在蒼苔。眼高嬾爲凡花醉。腸斷驚聞暮角哀。寫向素綃時拂拭。移來幽圃自栽培。論心竟是明年事。輸與醪醑在酒盃。

新晴午枕初起信筆

閉戶日陶然。晴窗春已妍。華胥夢中國。龍漢劫初年。浩浩塵揚海。茫茫杵倚天。何妨駕孤鶴。小憩華山前。

乙巳早春

故故啼鶯傍曲廊。飛飛戲蝶度橫塘。病來對酒心雖怯。老去逢花眼尙狂。牀擁琴書供枕籍。簾通風月索平章。一丘一壑從來事。起就功名未苦忙。

小雨

細細溼春光。霏霏破夕陽。臥聞驚倦枕。起看入虛堂。映葉鶯猶囀。爭泥燕正忙。閑愁無遣處。誰與共飛觴。

南樓遇大風雨

歎息誰如造物雄。故將意氣壓衰翁。千羣鐵馬雲屯野。百尺金蛇電掣空。身羨漁蓑鳴急雨。心憐鴉陣困狂風。世間變態誰能測。歸路斜陽十里紅。

春晚至山中因訪陳道人

一春衰病集殘骸。太息流塵覆酒杯。僧鉢始知葶菜老。佛瓶初見杏花開。蘋溪小雨成幽討。松院斜陽又獨來。不爲愛閑從野叟。年來萬事學低摧。

小隱

小隱在江干。茆廬亦易安。庖廚供白小。籬落蔓黃團。蹭蹬馮唐老。飄零范叔寒。世情從迫隘。醉眼覺天寬。

春興

萬事不關身。翛然一幅巾。雖非愛酒伴。猶是別花人。杜詩走覓南隣愛酒伴。白樂天紫薇花詩。不別花人不與看。領略琴書意。掃空車馬塵。東阡與南陌。隨處夢殘春。

曾仲躬見過適遇予出留小詩而去次韻二首

地僻元無俗客來。蓬門只欲爲君開。山橫翠黛供詩本。麥卷黃雲足酒材。

又

數樹山花草舍東。想公繫馬落殘紅。那知老子耶溪上。正泛朝南暮北風。

睡起

風約飛花滿曲廊。蕭然無客共焚香。瓮醅力重初投枕。鼻鼾聲豪已撼牀。栩栩夢遊心自適。昏昏起坐日方長。靜憑一几吾何恨。笑殺穿簾燕子忙。

病起

山村病起帽圍寬。春盡江南尚薄寒。志士淒涼閑處老。名花零落雨中看。斷香漠漠便支枕。芳草離離倚倚闌。收拾吟牋停酒椀。年來觸事動憂端。

山居戲題

海山縹渺斷雲扃。掃地焚香悅性靈。嫩白半甌嘗日鑄。硬黃一卷學蘭亭。衰顏冉冉臨清鏡。華髮蕭蕭倚素屏。尊酒不空身見在。莫爭天上少微星。

又

病起清羸不自持。年光都上鬢邊絲。昏昏雨細梅黃後。漫漫秧青水滿時。曲几方牀娛永日。矮冠高屐駭羣兒。客來莫笑狂顛甚。此處那容世俗知。

芒種後經旬無日不雨偶得長句

芒種初過雨及時。紗廚睡起角中敲。癡雲不散常遮塔。野水無聲自入池。綠樹晚涼鳩語鬧。畫梁晝寂燕歸遲。閑身自喜渾無事。衣覆熏籠獨誦詩。

久雨喜晴十韻

一雨二十日。頽牆屋茆爛。扶杖出門行。四顧水瀰漫。村迴鳩爭巢。村昏雞失旦。荒庭蛙黽豪。空廡螢火亂。蠹魚敗書編。萍草黏戶半。清風忽東來。一剪雨脚斷。天青日杲杲。河白星燦燦。車轍尋舊途。船步出新岸。稍喜泥潦乾。破竈得炊爨。賤貧固多憂。長歌寄吾歎。

盆池

人生何處不兒嬉。一世元知孰是非。汲井埋盆鑿苔破。敲針作釣得魚歸。蕭蕭菰葉風聲細。嫋嫋蘋花雨點稀。並舍老翁能喜事。爲添拳石象苔磯。盆池初成。隣人吳氏老送小石置池上。

月中過蜻蜓浦

天光水色合爲一。舟出西城猶落日。一規忽見寒璧升。萬頃坐歎溶銀溢。哀哀姑惡訴何苦。熠熠螢火光自失。葦低時見小艇過。水響遙知大魚出。銅壺玉酒我徑醉。短髮垂肩蓬不櫛。緩篙遡月勿遽行。坐待湘妃鼓瑤瑟。

六峯項里看探楊梅連日留山中

綠陰翳翳連山市。丹竇纍纍照路隅。未愛滿盤堆火齊。先驚探領得驪珠。斜簪寶髻看遊舫。細織筠籠入上都。醉裏自矜豪氣在。欲乘風露摘千株。

雨中自項里夜至新塘捨舟步歸

檠炬如椽點不明。還家潦水與階平。一盃濁酒頽然睡。恍似金牛夜下程。

又

天如漆黑泥沒踝。老健猶能蹠蹠歸。裊裊爐香支枕看。終年只合掩柴扉。

夜聽竹間雨聲

解醒不用酒。聽雨神自清。治疾不用藥。聽雨體自輕。我居萬竹間。蕭瑟送此聲。焚香倚蒲團。袖手坐三更。人苦不自覺。忿慾投隙生。起歆簷間雨。更與此君盟。

泛三江海浦

鼉負三山碧海秋。龍驤萬斛放翁遊。少舒我輩胸中氣。一掃羣兒分外愁。醉斬長鯨倚天劍。笑凌駭浪濟川舟。悠然高詠平生事。齷齪寧能老故丘。

獨酌有懷南鄭

憶從嶓冢涉南沮。笳鼓聲酣醉膽麤。投筆書生古來有。從軍樂事世間無。秋風逐虎花叱撥。夜雪射熊金僕姑。白首功名元未晚。笑人四十歎頭顱。

秋日泛鏡中憩千秋觀

病起重來理釣絲，扁舟迨及素秋時。舊交猶有青山在，幽趣唯應白鳥知。冉冉年光行老矣，茫茫世路欲何之。秦皇酒榼苔封遍，虛負霜螯左手持。湖山之間有石號秦皇酒瓮。

秋夕虹橋舟中偶賦

解纜初離小市門，放篙衝破一谿雲。露螢合散自成陣，水鳥飛鳴如覓羣。楓落荷疎秋漸老，河傾斗轉夜將分。書生老負功名志，醉裏長歌強一欣。

秋思

一徑苔侵四壁空，北窗支枕聽秋鐘。故人去後登樓怯，白髮多來覽鏡慵。狂憶射麋窮楚澤，閑思釣雪泛吳松。相如病渴年來劇，釀酒傾家畏不供。

自嘲

窮途久矣歎吾衰，雙鬢新添幾縷絲。身是在家狂道士，心如退院病禪師。極知勾漏求丹藥，不及衡陽賣漉籬。習氣若爲除未盡，小軒風月又成詩。

豐年行

秋風蕭蕭秋日薄，築場穫稻方竭作。志士雖懷晚歲悲，農家自足豐年樂。撥醅白酒喚鄰曲，啄黍黃雞初束縛。長魚出網健欲飛，新兔臥盤肥可臠。躬耕辛苦四十年，一飽豈非天所酢。書生識字亦聊爾，莫作揚雄老投閣。

秋夜泊舟亭山下

逢水逢山到處留。可憐身世寄孤舟。一汀蘋露漁村晚。十里荷花野店秋。羽檄未聞傳塞外。金椎先報擊衙頭。聞塵曾行帳爲壯士所攻。幾不免。塵語謂曾所在爲衙頭。煌煌太白高千丈。那得功名取次休。

初秋山中作

萬里西風吹幅巾。卽今真個是閑人。堆盤菱熟燕脂角。藉藻鱸新淡墨鱗。姥嶺蹇驢尋雪徑。娥江孤艇繫煙津。飄然樂事真當勉。遠付十年無此身。

秋夜讀書有感

久病畏長夏。枕簟如炮焚。扶持賴藥物。俛仰秋已分。清夜炷爐香。裊裊起孤雲。靈府豁蒙滯。舊學資鉅耘。言念總角初。操觚極艱勤。諸老頗賞識。謂可與斯文。沉痾幸鍼石。輪困勞斧斤。可憐四十年。薄陋負所聞。白首猶著書。逝將獻吾君。太官薦玉食。野人徒美芹。

晚涼登山亭

庭空葉飛秋。村迴鳩喚雨。新涼入巾褐。老子頗欲舞。憑高望稽山。秀色溢天宇。一鏡三百里。水落分別浦。淒涼吊禹穴。秦漢未爲古。世俗誰與歸。吾其老農圃。

夜步

市人莫笑雪蒙頭。北陌南阡信脚遊。風遞鐘聲雲外寺。水搖燈影酒家樓。鶴歸遼海逾千歲。楓落吳江又一秋。却掩船扉耿無寐。半窗落月照清愁。

感秋

秋堂露氣清。蕭爽入毛骨。葛桐耿無寐。坐待山月沒。溼螢飛不起。熠熠依衰草。勁風西北號。落葉紛可埽。老生惜歲月。烈士志功名。登臨送將去。非復兒女情。懸知青海邊。殺氣橫千里。良時不可失。胡行速如鬼。時聞慶會自香草。旋入秋山。蓋遠邁矣。

病中作

一病二十日。直愁難自還。殘書不成讀。長夜只供閑。風舞迎霜葉。雲昏欲雨山。臨窗忽自笑。詩思又相關。送猷講主赴李明府姜山之招

貫花籤帙壓車轅。惟子窮探到本源。聽法鬼神環麈尾。質疑英俊集龍門。孤舟此日輕爲別。尺素何時遠見存。坐想文殊對摩詰。高談無礙九河翻。

雨中排悶

點點滴滴雨不晴。暗暗淡淡燈不明。皇天胡爲貸此老。病臥垂困今已平。卻慙向者力量淺。鼠肝蟲臂猶關情。百年終歸朝露速。一死正自秋毫輕。明朝且作山中行。青鞋已覺白雲生。豐年處處村酒好。莫教湘湖蓴菜老。湘湖在蕭山縣。蓴菜絕奇。

秋夜歌

書生白首無處著。病臥空齋夜蕭索。茶鐺颼颼候湯熟。燈檠蔌蔌看燼落。山童喚起已復倒。顧影自笑如孤鶴。人言富貴墮駭機。一生窮愁正不惡。架上故裘破見肘。牀頭殘酒傾到脚。問君何以塵霜風。悠然臥

聽山城角

病起鏡中見白髮。此去七十無十寒暑矣。偶得長句。

短鬢蕭條失故青。人間真似宿郵亭。正令寬作十年夢。安用更留三日醒。覆瓿書成空自苦。擊轅歌罷遣誰聽。客來若覓衰翁處。睡起悠然倚素屏。

初寒宴坐

微火如螢度篆盤。明窗坐敗幾蒲團。羣兒誰信老懷嬾。萬事不禁醒眼看。道在簞瓢端自足。心閑天地本來寬。此生自斷君知否。不辦歸裝也掛冠。

溪行

霜落水初澄。星繁月未升。近村聞夜犬。隔浦見秋燈。多病乃如許。微寒已不勝。平生鄰曲意。移棹避漁罾。

又

疎鐘度莽蒼。遠火耿微茫。歲暮水歸壑。夜寒天霽霜。人生一蟲臂。世路幾羊腸。老大忘繩檢。狂歌盡意長。

讀書

遠遜江湖上。端居風雨中。紙新窗正白。爐煖火通紅。籤帙方重整。聲形且細窮。扶衰倘未死。更破十年功。

自嘲用前韻

殘年過六十。寂寞臥山中。病眼驚新暗。衰顏失舊紅。人譏作詩瘦。自憫著書窮。輸與封侯骨。雲臺競策功。病中久廢遊覽。悵然有感。

裘馬清狂徧兩川。十年身是地行仙。歸來訪舊半爲鬼。已矣此生休問天。不恨盃觴無藉在。但悲山水曠周旋。垂虹風月休如昨。安得青錢買釣船。

新釀熟小飲

玉船潏潏酌鵝黃。菊欲殘時抵死香。似與幽人爲醉地。清笳聲裏一天霜。

又

籬菊猶堪采落英。一尊玉瀝釀初成。今宵要向中庭飲。不展華茵展月明。

題徐淵子環碧亭有茶山曾先生詩

茶山丈人厭囂譁。幅巾每訪博士家。小亭談笑不知暮。往往城上聞吹笳。興來傑作粲珠璧。歲久妙墨亡龍蛇。郎君弟子多白髮。回頭日月如奔車。徐卿赤城古仙子。十年四海推才華。覽觀陳迹喜不寐。旋補罅漏支傾斜。曲池還浸古來月。叢莽忽見當時花。重題舊句照高棟。力振風雅排淫哇。席間紵袍已散鶻。堂上講鼓初停撾。速宜力置竹葉酒。不用更淪桃花茶。桃花茶見曾公詩。

雜興

鱣井初生一縷雲。鮑郎山下雨昏昏。鴈聲嘔軋秋空曉。水際人家尙閉門。

又

孤夢初回揭短篷。橋邊曉日已曛曛。太平氣象君知否。盡在豐年笑語中。

又

古寺高樓暮倚闌。野雲不散白漫漫。好山遮盡君無恨。且作滄溟萬里看。

大雪

大雪江南見未曾。今年方始是嚴凝。巧穿簾罅如相覓。重壓林梢欲不勝。氈帳擲盧忘夜睡。金羈立馬怯晨興。此生自笑功名晚。空想黃河徹底冰。

遣興

書生不自憐。老眼付皇天。已飽三升稷。寧堆百屋錢。紅塵忙過日。青嶂醉論年。名字元虛幻。從人謗是仙。

委轡

委轡去悠悠。山窮得渡頭。白雲生碧巘。翠木擁朱樓。野榼淵明酒。征塵季子裘。自憐詩興在。杜若滿芳洲。

雪中作

竹折松僵鳥雀愁。閉門我亦擁貂裘。已忘作賦遊梁苑。但憶銜枚入蔡州。屬國餐氈真強項。翰林煮茗自風流。明朝日暖君須記。更看青鴛玉半溝。

夢筆驛

朱扉水際亭。白塔道邊寺。扁舟幾往返。每過輒歔歔。經秋病不死。歲暮復□至。少年自喧譁。此老獨顛顛。可憐釣鰲客。終返屠羊肆。吾身行亦無。榮辱安所寄。短燈照孤愁。寒衾推殘醉。明當臨大江。一灑壯士淚。

舟中感懷三絕句呈太傅相公兼簡岳大用郎中

浪中鞢鞞雨聲寒。孤夢初回燭半殘。甲子一周胡未滅。關山還帶淚痕看。

又

雨打孤篷酒漸消。昏燈與我共無聊。功名本是無憑事。不及寒江日兩潮。

又

夢筆亭邊擁鼻吟。壯圖蹭蹬老侵尋。不眠數盡雞三唱。自笑當年起舞心。

西興泊舟

衰髮不勝白。寸心殊未降。避風留水市。岸幘倚船窗。日上金谿海。潮來雪捲江。登臨數奇觀。未易敵吾邦。

錢清夜渡

輕舟夜絕江。天闊星磊磊。地勢下東南。壯哉水所匯。月出半天赤。轉盼離巨海。清暉流玉宇。草木盡光彩。男子志功名。徒死不容悔。坐思黃河上。橫戈被重鎧。晚途雖益困。此志願常在。一日天勝人。醜虜安足醜。

夜歸

晡時振柁離西興。錢清夜渡見月升。浮橋沽酒市嘈囂。江口過埭牛凌兢。寒齋煮麩坐茆店。小鮮供饌尋魚罾。偶逢估客問姓字。歡笑便足爲交朋。須臾一飽各散去。帆席健快如超騰。雲間戍樓鼓坎坎。山尾佛塔燈層層。夜分到家趨篝火。穉子驚起頭鬢鬢。道途辛苦未暇說。一尊且復驅嚴凝。

江北莊取米到作飯香甚有感

我昔從戎清渭側。散關嵯峨下臨賊。鐵衣上馬蹴堅冰。有時三日不火食。山蕎畬粟雜沙礫。黑黍黃宋如土色。飛霜掠面寒壓指。一寸赤心惟報國。卽今歸臥稽山下。眼昏臂弱衰境逼。新秔炊飯香出甑。風殭澗

飲何曾識。我豈農家志。飽暖閉戶。惟思事耕織。征遼詔下。倘可期。盾鼻猶堪試。殘墨。

感興

築室真須待伯夷。起墳仍合近要離。藥來賊境靈何用。米出胡奴死不炊。下石紛紛驚俗薄。絕絃寂寂嘆吾衰。一尊且作尋春計。又見東風浩蕩時。

新春

濃濛煙雨暗江干。新歲還勝故歲寒。酒壓濁清鳴社瓮。菜分紅綠簇春盤。良辰節物元如昨。病客情懷自鮮歡。卻羨村鄰機上女。隔籬相喚祭蠶官。

新年

寄迹人間夢已長。新年脫帽始微霜。坐中使氣如秦俠。陌上行歌類楚狂。掃榻欲招貧與語。杜門聊以醉爲鄉。稽山剡曲雖堪樂。終憶祁連古戰場。

遊鏡湖

禹祠柳未黃。剡曲水已白。魴鱖來洋洋。鳧雁去拍拍。皇天亦大度。能容此狂客。挂席乘長風。未覺湖海迤。讀書五十年。自笑安所獲。昔人精微意。豈獨在簡冊。驥空萬馬羣。裘非一狐腋。超然登玉筍。及此煙月夕。玉筍峯在會稽山南。

初春晚晴

雪盡冰消斂積威。參差碧瓦帶斜暉。土膏漸釋人東作。天氣初和雁北歸。小閣金船嘗臘酒。華堂銀燭製

春衣關心雖有尋梅夢。冷蕊幽香事已非。自占歲多風雪。屢廢觀梅之集。

偶讀山谷老境五十六翁之句作六十二翁吟

三百里湖水接天。六十二翁身刺船。飯足便休慵念祿。丹成不服怕登仙。胸中浩浩了無物。世上紛紛徒可憐。但有青錢沽白酒。猶堪醉倒落梅前。

自開歲略無三日晴戲作長句

新年暗曉覺春慳。變化相乘一瞬間。雨脚稍收初見日。風花忽起又遮山。風欲作則大霧充塞。謂之風花。欲行幽圃還成阻。未脫重裘自笑孱。桃李會開君勿恨。清尊且用破衰顏。

置酒梅花下作短歌

歲月不貸人。綠髮成華顛。此生幾兩屐。念之每悽然。我本塵外客。已絕區中緣。惟當及未死。勤醉梅花前。瘦影寫微月。疎枝橫夕煙。偃蹇巖壑間。欲與松忘年。豈亦薄世俗。忽逐天風翩。吾詩不徒歌。持配湘娥弦。

梅花已過開東村一樹盛開特往尋之慨然有感

春晚城南十里陂。亭亭獨立見奇姿。品流不落松竹後。懷抱惟應風月知。旋拂亂雲成小佇。重攜芳榼卜幽期。佳人空谷從來事。莫恨桃花笑背時。

思蜀

老子饑堪笑。珍盤憶少城。流匙抄薤飯。加糝啜巢羹。揖美傾筠籠。茶香出土鎊。西郊有舊隱。何日返柴荆。

書憤

早歲那知世事艱。中原北望氣如山。樓船夜雪瓜洲渡。鐵馬秋風大散關。塞上長城空自許。鏡中衰鬢已先斑。出師一表真名世。千載誰堪伯仲間。

南窗擘黃柑獨酌有感

放翁潦倒鬢成絲。也把花前酒一卮。何限人間堪恨事。黃柑丹荔不同時。

久雨驟晴山園桃李爛熳獨海棠未甚開戲作

雨霽風和日漸長。小園尊酒答年光。直令桃李能言語。何似多情睡海棠。

臨安春雨初霽

世味年來薄似紗。誰令騎馬客京華。小樓一夜聽春雨。深巷明朝賣杏花。矮紙斜行閑作草。晴窗細乳戲分茶。素衣莫起風塵嘆。猶及清明可到家。

延和殿退朝口號

雨餘未肯放朝暾。穿仗恭承聖主恩。清蹕傳聲徐御殿。立庭中頃之。奏姓名。上乃自東廂出御座。紫衣引拜許龍門。徘徊漫結堯階戀。零落難招楚澤魂。歸去猶堪誇里巷。桐江新賜兩朱轡。

又

十年短櫂樂滄波。強著朝衫棄釣蓑。才薄何堪試馮翊。恩深猶許對延和。空牆煙柳遙迎馬。輦路春恨欲濺韉。莫恨此身衰病去。同時朝士久無多。

簡楊庭秀

袞袞過白日悠悠良自欺。未成千古事。易滿百年期。黃卷閑多味。紅塵老不宜。相逢又輕別。此恨定誰知。

飲張功父園戲題扇上

寒食清明數日中。西園春事又匆匆。梅花自避新桃李。不爲高樓一笛風。

夜泛西湖示桑甥世昌

嗟我客上都。忽已見暮春。騎馬出闕門。眯眼吹紅塵。西湖商賈區。山僧多市人。誰令汚泉石。只合加冠巾。黃冠更可憎。狀與屠沽鄰。駒駒酒肉氣。吾輩何由親。少須一闋散。境寂鷗自馴。舉手邀素月。移舟采青蘋。鐘從南山來。殷殷浮煙津。鶴髮隱者歟。長樂收釣緝。畏冷不竟夕。恨此老病身。明發復擾擾。吾詩其絕麟。

小舟過御園

聖主憂民罷露臺。春風別苑畫常開。盡除曼衍魚龍戲。不禁芻蕘雉兔來。水鳥避人橫翠靄。宮花經雨委蒼苔。殘年自喜身強健。又作清都夢一回。

又

水殿西頭起砌臺。綠楊鬧處杏花開。簫韶本與人同樂。羽衛纔聞歲一來。鷁首波生涵藻荇。金鋪雨後上莓苔。遠臣宴應無日。目斷堯雲到晚回。

自真珠園泛舟至孤山

呼船徑截鴨頭波。岸幘閑登瑪瑙坡。弦管未嫌鶯鷺起。塵埃無奈污花何。宦情不到漁蓑底。詩興偏於野寺多。明日一藤龍井去。誰知伴我醉行歌。

眞珠園雨中作

清晨得小雨。憑閣意欣然。一掃羣兒迹。稍稀遊女船。煙波蘸山腳。溼翠到闌邊。坐誦空濛句。予懷玉局仙。還家

富貴元須早致身。白頭豈復市朝人。數聲鶉鴉呼殘夢。一架醅釀送晚春。疊嶂出雲明客眼。澄江漲雨濯京塵。逢人枉道哦詩瘦。下語今年尙未親。

又

天津橋上醉騎驢。一錦囊詩一束書。作客況當多病後。還家已過暮春初。泥深村巷人誰顧。草滿園畦手自鉏。不爲衰遲思屏迹。此心元向利名疎。

初歸偶到近村戲書

雨過一村暗。風回百草香。刺船過古埭。倚杖立新塘。醉覺乾坤大。閑知日月長。暮歸詩滿卷。雖老尙能狂。題跨湖橋下酒家

湖水綠於染。野花紅欲燃。春當三月半。狂勝十年前。小店開新酒。平橋上畫船。翩翩幸強健。不必愧華顛。春遊至樊江戲示坐客

江頭蕭蕭春色暮。柳陰遊魚飽飛絮。莖羹箭筍美如玉。點鼓絲絳滑縈筍。銀鞍烏帽尋春客。朱戶青旗沽酒處。浮生細看纔幾時。一笑自應忘百慮。綠盃到手不肯盡。寶帶照地身何與。醅釀爛熳我欲狂。茗芋還家君勿遽。

暮春

顛顛都門白髮新。歸來一振客衣塵。啼鶯妒夢頻催曉。飛絮鍾情獨殿春。湖上風光猶淡沱。尊前懷抱頗清真。詩成絕恨知心少。自寫吳牋寄故人。

天華寺前遇縣令過避之入寺僧皆晝睡

墮絮飛花掠釣船。天華寺下賞春妍。縣多官府鳴騶過。僧少叢林避客眠。出網長魚猶鱗鱗。爭泥新燕欲翩翩。典衣剩買旗亭醉。已過旗亭六十年。

偶得海錯侑酒戲作

判無神藥廩清冥。放筯那憎海物腥。滿貯醇醪漬黃甲。密封小盞餉紅丁。從來一飽忘南北。此去千鍾任醉醒。添雪更知憑茗椀。山童敲臼隔窗聽。

雨晴遊香山

雨打餘醺夜未拆。一晴柳岸先飄雪。我搖畫幟鏡湖中。碧水青天兩奇絕。長歌縹緲雲不動。橫笛清悲竹將裂。悠然起舞影零亂。卓爾四顧心激烈。好山可隱輕捨去。故人已貴長乖隔。肺渴生塵防酒興。眼暈成花作書厄。平生所期無一遂。獨有曠快相除折。夜歸燈火鬧湖邊。淡淡西南一鉤月。

春遊絕句

一百五日春郊行。三十六溪春水生。千秋觀裏逢急雨。射的峯前看晚晴。自秦望山而北。合三十六溪水

爲若耶溪。

夜行玉筍樵風之間宿龍瑞

野店谿橋供晚餉。吟邊醉裏弄春風。馬行缺月黃昏後。鍾下亂山空翠中。名宦不辭成寂寂。歲時惟恨去
忽忽。頗聞禹穴遺書在。安得高人與細窮。

聞傅氏莊紫笑花開急棹小舟觀之

日長無奈清愁處。醉裏來尋紫笑香。漫道閑人無一事。逢春也似蜜蜂忙。

遊法雲寺觀彝老新葺小園

古寺朱扉榜水開。高僧笑語共徘徊。陰陰曲徑人稀到。一一名花手自栽。竹筧引泉滋藥壠。風爐篝火試
茶盃。此行自喜非生客。二百年間六世來。五世祖太保公捨園地建寺。

鹹齋十韻

九月十月屋瓦霜。家人共畏畦蔬黃。小甕大甕盛滌濯。青蔥綠韭謹蓄藏。天氣初寒手訣妙。吳鹽正白山
泉香。挾書旁觀穉子喜。洗刀竭作廚人忙。園丁無事臥曝日。棄葉狼藉堆空廊。泥爲緘封糠作火。守護不
敢非時嘗。人生各自有貴賤。百花開時促高宴。劉伶病醒相如渴。長魚大肉何由薦。凍齋此際價千金。不
數狐泉槐葉麵。磨挈便腹一欣然。作歌聊續冰壺傳。

長門怨

未央宮中花月夕。歌舞稱觴天咫尺。從來所恃獨君王。一日讒興誰爲直。只之天今萬里。空在長安一
城裏。春風時送簫韶聲。獨掩羅巾淚如洗。淚如洗兮天不知。此生再見應無期。不如南粵匈奴使。航海梯

山有到時。

遣興

莫羨朝回帶萬釘。吾曹要可草堂靈。風來弱柳搖官綠。雲破奇峯湧帝青。聽盡啼鶯春欲去。驚回夢蝶醉初醒。從教俗眼憎疎放。行矣桐江醉客星。

晨坐道室有感

一鉢青精便有餘。世間萬事總成疎。手揮絃上烏棲曲。口誦巖間鳥跡書。丹氣初升勤沐浴。芝房未熟飽耘鋤。碧霄騰舉人人事。莫戀污渠與臭帑。

晝臥

忽忽見春盡。徂年那更還。香生帳裏霧。書積枕邊山。凌厲心猶壯。沈緜氣已孱。千秋有管葛。看鏡汗吾顏。

雨晴

久雨作我病。今朝身頓輕。花房避初旭。簾影弄新晴。漉酒綸巾折。聽琴拄杖橫。翛然又終日。未覺負平生。

宿石帆山下

卷地東風吹釣船。石帆重到又經年。放翁夜半酒初解。落月啣山聞杜鵑。

又

繫船禹廟醉如泥。投宿漁家月向低。溼翠撲人濃可掬。始知身在石帆西。

小雨泛鏡湖

吾州清絕冠三吳。天寫雲山萬幅圖。龍化廟梁飛白雨。鶴收仙箭下青蕪。菱歌嫋嫋遙相答。煙樹昏昏淡欲無。端辦一船多貯酒。敢辭送老向南湖。鏡湖一名南湖。

小憇村舍

藤梢維艇子。煙際覓人家。小婦簪新麥。羣童摘晚茶。溪雲易成雨。崖樹少開花。聊寄平生快。青鞋到若耶。

平水

水悍溪橋敗。沙頽野徑移。年華入詩卷。心事付筇枝。雨霽鶉鳩喜。春歸鷓鴣知。客庖消底物。麥飯薦蕪絲。

初夏山中

又報東皇促駕歸。醉中闕賦送春詩。佛餅是處見紅藥。僧榻有時聞子規。野客款門聊倒屣。谿潭照影一軒眉。年光佳處惟初夏。兒女紛紛詎得知。

雨後

礎潤還成雨。雲收旋作晴。巖花分日發。林筍逐番生。筆硯行常具。軒窗晚更明。塵埃幸不到。那得廢詩情。

雲門溪上獨步

山路聯翩十日陰。晚晴剩喜得幽尋。殘紅猶有數枝在。漲綠真成一倍深。泉響珮環鳴闔壑。月明珠璧散疎林。歸來寂寞鐘初動。羞向孤燈說壯心。

雲門過何山

漠漠稻滿陂。濛濛雨霑衣。林花落更新。礮鳥止復飛。我作山中行。十日未擬歸。思酒過野店。念茶叩僧扉。

眠枕松下石。適意無訶譏。心廣體自舒。泰然不肉肥。念昔在官塗。萬事與願違。逢人無一欣。對食或累歎。低回三十年。竟不飽蕨薇。空將書五車。自誑腹十圍。餘日猶幾何。可復貪塵鞿。賸拾柏子香。閉門觀昨非。

明覺院

細路蟠青壁。層軒倚碧空。天香下塵世。僧梵起雲中。藤絡將頽石。松號不斷風。尤憐扶杖處。直下數飛鴻。自雲門至上竈。欲遊一二僧。菴以雨不果。

道遠晨炊米。風和晝減衣。花殘孔官廟。苔滿葛仙磯。剩欲尋僧話。先判秉炬歸。山昏又成雨。心事固多違。

自上竈過陶山

宿雨初收見夕陽。縱橫流水入陂塘。蠶家忌客門門閉。茶戶供官處處忙。綠樹村邊停醉帽。紫藤架底倚胡牀。不因蕭散遺塵事。那覺人間白日長。

四月

四月江南暑尚微。虛堂初換葛衣時。嬾陪陌上雍容騎。且對窗間臚膊棊。糝徑落花猶片片。拂雲新竹已離離。年來病肺疎盃酌。應接風光賴有詩。

初夏閑居卽事

門巷蕭蕭日正長。方牀曲几傲羲皇。輕風忽起楊花鬪。清露初晞藥草香。對奕兩奩飛黑白。雋書千卷雜朱黃。穿簾語燕能從我。分爾湖邊一夏涼。

夜汲

酒渴起夜汲。月白天正青。銅瓶響寒泉。聞之心自醒。井邊雙梧桐。映月影離離。上有獨棲鵲。細爪握高枝。我欲畫團扇。良工不可求。三歎拊庭楯。浩然風露秋。

排悶

老去知心少。流塵鎖斷絃。尊空問字酒。囊罄作碑錢。掃葉供朝爨。和泥補漏船。胸中元浩浩。白眼望青天。

初夏夜賦

好景入新夏。幽人臥弊廬。廊腰得風遠。樹罅見星疎。門掩鴉棲後。鐘鳴月上初。青燈尙堪近。起了讀殘書。

新霽城南舟中夜興

身是江湖不繫船。雨餘隨處一翛然。浮雲盡斂出青嶂。孤月徐升行碧天。收網漁歌移別浦。隔城塔影落前川。明朝閑就平洲飲。巾履追涼又一年。

泊舟

灑岸煙波橫畫船。幅巾蕭散餞流年。兩行楊柳吹晴雪。只著啼鶯未著蟬。

又

湖水無風鏡面平。巉巖倒影萬峯青。放翁眼界便疎豁。過盡蘆村泊蓼汀。

飲伯山家因留宿

小醉悠然不作醒。斷雲飛盡卻成晴。月生檐外見簾影。風下城頭聞角聲。岸幘莎庭便髮冷。酌泉桐井覺魂清。雞號忽報明星上。夢破虛皇白玉京。

夜泛蜻蜓浦

四顧水無際。三更月未生。偶成搖櫂去。不減御風行。煙浦漁歌斷。蘆洲鬼火明。還家人已睡。小立叩柴荆。

晨起看山飲酒

愛山入骨髓。嗜酒在膏肓。跌宕風煙外。歌呼麴蘖傍。虛窗天柱曉。書堂正見天柱峯。小瓮囊泉香。家釀今年試用。歧下囊泉麴法。垂老叨微祿。無□□□忙。

枕上偶賦

初夏暑猶薄。紗幮怯夜深。孤螢入窗罅。斜月下牆陰。靜養觀書眼。窮悲濟世心。吾衰亦久矣。徂歲苦駸駸。

自詠

射的山前一老樵。此生何敢辱旌招。繆緣學道肱三折。不遇知音尾半焦。去蠹區區慙啄木。附高燁燁鄙凌霄。但令窮死心無愧。也勝鳴珂事早朝。

題齋壁

二十餘年此結茆。園公谿父日論交。風翻半浦亂荷背。雨放一林新笋梢。隔葉晚鶯啼谷口。啜花雛鴨聚塘坳。出門行罷還無事。借得丹經手自抄。

又

四顧茫茫水接天。幽居真個似乘船。月窗竹影連棲鷓。露井桐聲帶斷蟬。甘寢每憎茶作祟。清狂直以酒爲仙。形骸那得常羈束。六十年來又二年。

又

舴艋爲家一老翁。陽狂羞與俗人同。夢回菱曲漁歌裏。身寄蘋洲蓼浦中。斷簡塵埃存治道。高丘草棘閉英雄。旗亭村酒何勞醉。聊豁平生芥蒂胸。

又

稽山千載翠依然。著我山前一釣船。瓜蔓水平芳草岸。魚鱗雲襯夕陽天。出從父老觀秧馬。歸伴兒童放紙鳶。君看此翁閑適處。不應便謂世無仙。

